



АКАФИСТНИК
ПРАВОСЛАВНОЙ
МАТЕРИ



Сборник Акафистник православной матери

Серия «Молитвенный покров»

*Текст предоставлен правообладателем
http://www.litres.ru/pages/biblio_book/?art=11829425
Акафистник православной матери / [пред. свящ. А38 Федора
Людоговского]: ДАРЪ; Москва; 2014
ISBN 978-5-485-00502-3*

Аннотация

В сборнике содержится восемь акафистов: пять – Богородице в честь чудотворных икон и три – святым. Надеемся, что они помогут родителям в их молитвенной заботе о детях. Перед Феодоровской иконой молятся о даровании детей. Названия икон Богородицы «Помощница в родах», «Млекопитательница», «Воспитание» «Прибавление ума» говорят сами за себя. Преподобному Сергию, игумену Радонежскому, многие дети и их родители молятся о даровании успехов в учебе, а великомученику Пантелеимону с древних времен молятся об исцелении от телесных и душевных болезней. К святителю Николаю Чудотворцу христиане обращаются во всех своих нуждах, в том числе молятся и об устройении семейной жизни своих детей .

Содержание

Предисловие	14
Акафист Пресвятой Богородице в честь иконы Ее, именуемой «Феодоровская»	18
Кондак 1	18
Икос 1	19
Кондак 2	21
Икос 2	22
Кондак 3	23
Икос 3	24
Кондак 4	25
Икос 4	26
Кондак 5	27
Икос 5	28
Кондак 6	29
Икос 6	30
Кондак 7	31
Икос 7	32
Кондак 8	34
Икос 8	35
Кондак 9	37
Икос 9	38
Кондак 10	39
Икос 10	40

Кондак 11	41
Икос 11	42
Кондак 12	43
Икос 12	44
Кондак 13	45
Икос 1	46
Кондак 1	48
Молитва	49
Акафист Пресвятой Богородице в честь иконы Ее, именуемой «Помощница в родах»	52
Кондак 1	52
Икос 1	53
Кондак 2	54
Икос 2	55
Кондак 3	56
Икос 3	57
Кондак 4	58
Икос 4	59
Кондак 5	60
Икос 5	61
Кондак 6	62
Икос 6	63
Кондак 7	64
Икос 7	65
Кондак 8	66
Икос 8	67

Кондак 9	68
Икос 9	69
Кондак 10	70
Икос 10	71
Кондак 11	72
Икос 11	73
Кондак 12	74
Икос 12	75
Кондак 13	76
Икос 1	77
Кондак 1	78
Молитва	79
Акафист Пресвятой Богородице в честь иконы Ее, именуемой «Млекопитательница»	85
Кондак 1	85
Икос 1	86
Кондак 2	87
Икос 2	88
Кондак 3	89
Икос 3	90
Кондак 4	91
Икос 4	92
Кондак 5	93
Икос 5	94
Кондак 6	95
Икос 6	96

Кондак 7	97
Икос 7	98
Кондак 8	99
Икос 8	100
Кондак 9	101
Икос 9	102
Кондак 10	103
Икос 10	104
Кондак 11	105
Икос 11	106
Кондак 12	107
Икос 12	108
Кондак 13	109
Икос 1	110
Кондак 1	111
Молитва	112
Акафист Пресвятой Богородице в честь иконы Ее, именуемой «Воспитание»	116
Кондак 1	116
Икос 1	117
Кондак 2	118
Икос 2	119
Кондак 3	120
Икос 3	121
Кондак 4	122
Икос 4	123

Кондак 5	124
Икос 5	125
Кондак 6	126
Икос 6	127
Кондак 7	128
Икос 7	129
Кондак 8	130
Икос 8	131
Кондак 9	132
Икос 9	133
Кондак 10	134
Икос 10	135
Кондак 11	136
Икос 11	137
Кондак 12	138
Икос 12	139
Кондак 13	140
Икос 1	141
Кондак 1	142
Молитва ко Господу	143
Молитва к Божией Матери	145
Акафист Пресвятой Богородице в честь иконы Ее, именуемой «Прибавление ума»[1]	147
Кондак 1	147
Икос 1	148
Кондак 2	149

Икос 2	150
Кондак 3	152
Икос 3	153
Кондак 4	155
Икос 4	156
Кондак 5	158
Икос 5	159
Кондак 6	160
Икос 6	161
Кондак 7	163
Икос 7	164
Кондак 8	165
Икос 8	166
Кондак 9	167
Икос 9	168
Кондак 10	169
Икос 10	170
Кондак 11	171
Икос 11	172
Кондак 12	173
Икос 12	174
Кондак 13	176
Икос 1	177
Кондак 1	178
Молитва	179
Акафист преподобному Сергию, игумену	182

Радонежскому

Кондак 1	182
Икос 1	183
Кондак 2	185
Икос 2	186
Кондак 3	188
Икос 3	189
Кондак 4	191
Икос 4	192
Кондак 5	194
Икос 5	195
Кондак 6	197
Икос 6	198
Кондак 7	199
Икос 7	200
Кондак 8	201
Икос 8	202
Кондак 9	204
Икос 9	205
Кондак 10	207
Икос 10	208
Кондак 11	210
Икос 11	211
Кондак 12	213
Икос 12	214
Кондак 13	216

Икос 1	217
Кондак 1	219
Молитва	220
Акафист великомученику и целителю	223
Пантелеимону	
Кондак 1	223
Икос 1	224
Кондак 2	225
Икос 2	226
Кондак 3	227
Икос 3	228
Кондак 4	229
Икос 4	230
Кондак 5	231
Икос 5	232
Кондак 6	233
Икос 6	234
Кондак 7	235
Икос 7	236
Кондак 8	237
Икос 8	238
Кондак 9	239
Икос 9	240
Кондак 10	241
Икос 10	242
Кондак 11	243

Икос 11	244
Кондак 12	245
Икос 12	246
Кондак 13	247
Икос 1	248
Кондак 1	249
Молитва	250
Акафист святителю Николаю Чудотворцу	253
Кондак 1	253
Икос 1	254
Кондак 2	255
Икос 2	256
Кондак 3	257
Икос 3	258
Кондак 4	259
Икос 4	260
Кондак 5	261
Икос 5	262
Кондак 6	263
Икос 6	264
Кондак 7	265
Икос 7	266
Кондак 8	267
Икос 8	268
Кондак 9	269
Икос 9	270

Кондак 10	271
Икос 10	272
Кондак 11	273
Икос 11	274
Кондак 12	275
Икос 12	276
Кондак 13	277
Икос 1	278
Кондак 1	279
Молитва	280

Акафистник православной матери

Допущено к публикации Издательским Советом
Русской Православной Церкви № ИС Р14-411-1187

Исключительно для келейного пользования

© Людоговский Ф.Б., предисловие, 2014

© Издательство «ДАРЪ», 2014

Предисловие

Акафист – жанр древний и одновременно очень молодой. Первый акафист был написан в Византии не позднее 626 г. (возможно, в VI в. или даже во второй половине V в.) и посвящен Богородице. Этот прекрасный гимн и сейчас можно увидеть почти в любом молитвослове. Позже были написаны и многие другие акафисты – Пресвятой Троице, Спасителю, Богородице, ангелам и святым. В наше время ежегодно появляются десятки новых акафистов на разных языках: церковнославянском, греческом, румынском, сербском, польском, украинском, французском и др. Едва ли не половина из существующих на сегодняшний день полутора тысяч акафистов были созданы в наши дни, в последние 25–30 лет.

Структура акафистов достаточно проста. Каждый текст состоит из 25 строф – *кондаков* и *икосов*. Кондаки (кроме первого) заканчиваются воззванием *Аллилуия*. Икосы содержат *хайретизмы* – обращения к святому, к Богородице или Спасителю, как правило, начинающиеся со слова *Радуйся*. Завершаются икосы *рефреном* (припевом) – хайретизмом, который повторяется во всех икосах, а также в первом кондаке. В первом акафисте Богородице (его иногда называют Великим акафистом) рефрен звучит так: *Радуйся, Невесто Неневестная*. У каждого акафиста – свой рефрен. После икосов и кондаков следует молитва (или две-три молитвы).

Акафисты хороши тем, что их можно петь всем храмом (конечно, для этого у каждого человека должен быть перед глазами текст). Обычно священник читает кондак, а миряне поют *Аллилуия*; затем священник читает первую часть икоса, а миряне поют хайретизмы и рефрен. Таким образом прихожане оказываются вовлечены в богослужение, а не остаются, как это часто бывает, лишь зрителями и слушателями.

* * *

В предлагаемом вашему вниманию сборнике содержится восемь акафистов: пять – Богородице в честь чудотворных икон и три – святым.

Феодоровская икона – древний костромской образ Богоматери – тесно связана с историей дома Романовых. Перед этой иконой также молятся о даровании детей. Акафист в честь Феодоровской иконы был написан священником Павлом Орловым и впервые напечатан в 1886 году.

Названия икон Богородицы «Помощница в родах», «Млекопитательница» и «Воспитание» говорят сами за себя.

Акафист в честь еще одного образа Божией Матери – «Прибавление ума» – был написан нашим современником Александром Аршаковичем Трофимовым.

Преподобному Сергию, игумену Радонежскому, многие дети и их родители молятся о даровании успехов в учебе. Как известно из жития святого, отрок Варфоломей никак не мог

достичь грамоты, и он усердно молился Господу о помощи. Однажды ему встретился ангел в образе инокa, который дал мальчику кусочек просфоры со словами: «С сего дня Господь дарует тебе знание грамоты». Вернувшись домой, Варфоломей обнаружил, что может легко и быстро читать Псалтирь. Помещенный в нашeм сборнике акафист преподобному Сергию был написан, по всей видимости, иеромонахом Сильвестром (Медведевым) в 1689 году.

Великомученику Пантелеимону с древних времен молятся об исцелении от телесных и душевных болезней. Акафист великомученику был написан схимонахом Аркадием, насельником русского Пантелеимонова монастыря на Афоне, и одобрен Святейшим Синодом в 1860 году.

К святителю Николаю Чудотворцу христиане обращаются во всех своих нуждах, в том числе молятся и об устройении семейной жизни своих детей (история чудесной помощи, которую святитель оказал трем бедным девушкам и их отцу, изложена в 5-м иконе акафиста). Акафист святому относится к числу древнейших и изначально был написан на греческом языке.

Священник Федор Людоговский



Икона Пресвятой Богородицы «Феодоровская»

Акафист Пресвятой Богородице в честь иконы Ее, именуемой «Феодоровская»

Кондак 1

Взбранной Воеводе, Пренепорочней Деве Богородице, Заступнице нашей и предстательству христиан непостыдному, явлением чудная иконы Своя радование подавшей земле Российстей и вся верная чада Церкви просветившей, благодарение усердно приносим Ти, Богородице, и припадающе пречудному образу Твоему, умильно глаголем: спаси, Госпоже, и помилуй рабы Твоя, зовущия:

Радуйся, Мати Божия, Предстательнице и Заступнице наша усердная.

Икос 1

Ангел Гавриил от Бога послан бысть во град Назарет ко Пречистой Деве Марии, и вшед к Ней рече: «Радуйся, Благодатная, Господь с Тобою, благословенна Ты в женах!» Ангельскому гласу подражающе, и мы, грешнии, радости благодарения в сердце своем исполнени, пред явленным образом Твоим благохваления наша возносить к Тебе дерзаем, Пресвятая Богородице:

Радуйся, отрасли от корене Давидова благословенная;
радуйся, обетом родителей в жертву Богу принесенная.

Радуйся, святых праведных Иоакима и Анны Дщи богоданная;

радуйся, триех лет во храм Божий введенная и тамо воспитанная.

Радуйся, тамо смирением и чистотою всех удивившая;
радуйся, тамо ангельския беседы сподобльшаяся.

Радуйся, Дево, о зачатии Бога Слова благовестие во смирении приемшая;

радуйся, избранная Отроковице, к зачатию Бога Слова силою свыше осененная.

Радуйся, тайну воплощения Сына Божия, от веков в Бозе сокровенную, открывшая;

радуйся, Агнице, рождающая Агнца Христа, взявшего грехи мира.

Радуйся, Тобою бо избавляемся мук адовых;
радуйся, Тобою бо сподобляемся вечныя жизни.

Радуйся, Мати Божия, Предстательнице и Заступнице наша усердная.

Кондак 2

Видя икону Твою, Пресвятая Дево, на древе стоящу, князь благочестивый костромский ужасом многим содрога-
шеся, недоумея, что бысть видение сие. Хотящу же ему при-
яти ю и от сего свыше удержану ему бывшу, не можаше: уве-
деу, яко чудно есть иконы тоя явление, воззва к Богу: Алли-
луия.

Икос 2

Разумом желая разумети князь благочестивый пришествие пречуднаго Твоего образа во град Кострому, Богородице, душею, радования преисполненною, себе предаде водительству Божию, и преклонь колена, со страхом вопияше Тебе:

Радуйся, Дево, явльшая образ Свой чудно;
радуйся, Благословенная, в явлении образа Своего милосердие нам являющая.

Радуйся, о всех чтущих Сына Твоего промышляющая;
радуйся, всем просящим у Тебе дары, в меру веры, ко спасению подающая.

Радуйся, путь истины заблуждшим показующая;
радуйся, к горнему миру чудесы Твоими ум наш возводящая.

Радуйся, смущения помышлений сумнительных удаляющая;
радуйся, славящих Тя всегда прославляющая.

Радуйся, чистотою Твоею чистоте нас научающая;
радуйся, чистотою Твоею нечистоту нашу обличающая.
Радуйся, моления наша приемлющая;
радуйся, рыданий и слез не отметающая.

Радуйся, Мати Божия, Предстательнице и Заступнице наша усердная.

Кондак 3

Силу Божию благочестивый князь познав в восхождении образа чудного Твоего, Богомати, в явлении же видево милосердие Твое ко всем, спасение хотящим получитьи, рече: Аллилуия.

Икос 3

Имев помысл стяжати даруемое небесное сокровище, лик Твой светлый, Богомати, второе простре державный руку к образу низшедшему: узрев же паки его восхождение, скоро пойде во град и поведа о бывших ему освященному собору, да пришедше и видяще иконы Твоея явление, возопиют с ним вернии:

Радуйся, Царице Небесе и земли;

радуйся, Престоле Царя царствующих.

Радуйся, Пренепорочная Дево;

радуйся. Мати Неприступнаго Света.

Радуйся, Честнейшая Херувим;

радуйся, Славнейшая без сравнения Серафим.

Радуйся, Небесными Силами величаемая;

радуйся, от всех земнородных ублажаемая.

Радуйся, неизреченное веселие Ангелов;

радуйся венче царственный всех пророков и апостолов.

Радуйся, православия Христовы Церкви ограждение;

радуйся, всех суемудрых учений и ересей низложение.

Радуйся, Мати Божия, Предстательнице и Заступнице наша усердная.

Кондак 4

Бурю внутрь имея помышлений недоуменных, освященный собор со псалмы и песньми духовными абие притече видети образ Твой, Неискусобрачная. Узрев же его на древе дивно стояща и благолепно красотою сияюща, рече: Аллилуия.

Икос 4

Слышаша людие честныя иконы Твоя, Богоотроковице, пришествие, и ко оной текше покланяхуся, аки Самей Тебе сущей, и со умилением и слезами вопияху к Тебе:

Радуйся, Дево, благословенная в женах, во чреве Твоем Носителя всяческих носившая;

радуйся, рождением Сына Твоего спасение миру всему являшая.

Радуйся, человеки с Богом соединившая;

радуйся, Превышшая Небес, избавляшая нас от клятвы.

Радуйся, нас к вечней жизни руководящая;

радуйся, Владычице мира.

Радуйся, Божие к смертным благоволение;

радуйся, смертных к Богу дерзновение.

Радуйся, благих во благости соблюдающая;

радуйся, лукавых на путь благий обращающая.

Радуйся, под сень крова Твоего прибегающих милующая;

радуйся, уповающим на Тя вся потребная к животу и благочестию дарующая.

Радуйся, Мати Божия, Предстательнице и Заступнице наша усердная.

Кондак 5

Яко боготечную звезду узреша людие икону Твою, безвестная Дево, и яко многосветлый светильник поставиша ю во святем соборнем храме, радующеся и вопиюще Богу: Аллилуия.

Икос 5

Видевше жителіе града Городца образ Твой, Владычице, во храме града Костромы стоящий, и на руку Твоею держама Богомладенца Иисуса, скорбию одержими беша: зане отшествіе его бысть из града их. Жителіе же костромстии, обрадованнии благоволением Твоим ко граду своему, приносят Ти дары, и с любовію лобызаяще Твой святыи образ, вопіют Ти:

Радуйся, Звездо, Солнце Правды нам являшая;
радуйся, возлюбившая сию страну.
Радуйся, обречение Тебе ищущих;
радуйся, радостию неизреченною верных сердца исполняющая.

Радуйся, сокровище благодати неистощимое;
радуйся, милости приснотекущий источниче.
Радуйся, от тяжких бед спасающая;
радуйся, от смертоносных язв избавляющая.
Радуйся, всего мира Ходатаице;
радуйся, всех недугующих Целительнице.
Радуйся, красото несравненная;
радуйся, доброто несказанная.

Радуйся, Мати Божия, Предстательнице и Заступнице наша усердная.

Кондак 6

Проповедницы богоноснии быша видевшии образ Твой, Богородице. Возвраща бо кийждо во страну свою, возвещающе о пришествии его и чудесех от него бываемых, воспевая Богу: Аллилуия.

Икос 6

Возсиявши благодать от чудного образа Твоего, Чистая, веру немощствующих утверди, верных же возвесели сердца любовью. Сего ради радуешься вопием Ти:

Радуйся, Пресвятая Дево, светом небесных истины нас озаряющая;

радуйся, мглу греховную от нас отгоняющая.

Радуйся, чудесы Твоими к боговедению нас приводящая;

радуйся, всех кающихся грешник ко благочестию подви-
зающая.

Радуйся, всех притекающих к Тебе крепкое заступление;

радуйся, немощствующих умом утверждение.

Радуйся, изнемогающих в вере возставляющая;

радуйся, тихое пристанище в море житейском обуреваемым.

Радуйся, злые советы сынов погибельных открывающая;

радуйся, вознесенную гордыню врагов отечества нашего
смиряющая.

Радуйся, православных царей Державо;

радуйся, всех христиан Похвало.

Радуйся, Мати Божия, Предстательнице и Заступнице на-
ша усердная.

Кондак 7

Хотя прославити Сын Твой, Богородице, святую икону Твою во граде Костроме, повеле ю в день Успения Твоего святому великомученику Феодору Стратилату носить по граду сему, да вси видяще чудо сие, благодарным сердцем возопиют Ему: Аллилуия.

Икос 7

Чудо новое яви нам Господь мольбами Твоими, Богородице, егда сгоревшу храму, в немже бе поставлен святой образ Твой, сохрани его в пепеле невредимым от огня, и тако мневших сгоревша его печаль в радость преложи. Мы же, чудо сие ведяще, воспеваем Ти таковая:

Радуйся, Купино Неопалимая;

радуйся, огненный Столпе, сущия во тьме наставляяй.

Радуйся, Животе, Духом позлащенный, невместимаго Бога вместивший;

радуйся, кадильнице златая, яко фимиам благоуханный, молитвы Твоя за ны к Богу Сыну присно возносящая.

Радуйся, Жезле Ааронов к явлению в мир Сына Твоего прозябший;

радуйся, Руно Гедеоново, благодатию Божиею во спасение наше орошенное.

Радуйся, Горо несекомая, от Неяже отсечеса краеугольный Камень Христос;

радуйся, Храме одушевленный, в немже вселися Божество телесне.

Радуйся, девства охранение;

радуйся, супружества благословение.

Радуйся, паче всех Господа возлюбившая;

радуйся, паче всех от Него превознесенная.

Радуйся, Мати Божия, Предстательнице и Заступнице наша усердная.

Кондак 8

Странное чудо видевши, на воздусе икону Богоматере стоящу, аки руками ангельскими держиму, егда второе сгоре храм, в немже стояше явленная сия икона, отвержемся, людие, мира сего, ум на Небеса преложше: сего бо ради и дадеся нам чудная икона Богородицы, да взирающе на ню, горящая мудрствуем, а не земная, вопиюще к Богу: Аллилуия.

Икос 8

В вышних пребывающи селениих, и нижних не разлучи-
лася еси, Богородице, чудесы Твоими всех просвещающи
приходящих к Тебе верою: сего ради и слышиши от нас сия:

Радуйся, Мати Христа Бога нашего, на Небеси пребыва-
ющая;

радуйся, на земли нас не оставляющая.

Радуйся, ради величества Твоего на Небеси Ангелы окру-
женная;

радуйся, ради славы Твоея на земли от человек прослав-
ляемая.

Радуйся, Тебе бо служат вся Небесныя Силы;

радуйся, Тебе бо, по Бозе, хваление возносят Херувими
и Серафими.

Радуйся, лице Божие выну на Небеси созерцающая;

радуйся, пред престолом Сына Твоего матерния руце
Твои, за ны молящиеся, простирающая.

Радуйся, нас сущих на земли от всякаго зла омофором
Твоим покрывающая;

радуйся, верных от всяких душепагубных дел удаляющая.

Радуйся, рождением Сына Божия двери Царства Христо-
ва нам отверзшая;

радуйся, надеждою приятия небесных благ верных души
успокояющая.

Радуйся, Мати Божия, Предстательнице и Заступнице наша усердная.

Кондак 9

Всякое естество ангельское превозносит Тя, Дево, великия ради любви Твоя к роду христианскому: незрима бо и непреступна, яко Мати Бога от земли к Небеси возшедшая, Пречистым Твоим образом зриму и приступну Себе являеши всем воспевающим Сыну Твоему: Аллилуия.

Икос 9

Ветия многовещанная, яко рыбы безгласны, зрим о Тебе, Богородице: недоумевают бо глаголати о славных чудесах, от явления Твоея иконы бываемых. Мы же, онем дивящися, благодарно вопием Ти:

Радуйся, слепых прозрение;
радуйся, хромых хождение.

Радуйся, от темных и лукавых духов исцеляющая;
радуйся, лучами, от Твоего Пречистаго образа изшедшими, врагов земли наша отгнавшая.

Радуйся, больным видение Твое даровавшая;
радуйся, молящимся явленной иконе Твоей исцеление по-
дающая.

Радуйся, расслабленных от одра болезни воздвизающая;
радуйся, немым разрешающая уста.

Радуйся, от плена вражия возвращающая;
радуйся, лютыя плоти страсти утоляющая.

Радуйся, души верных неизреченным милосердием Тво-
им умиляющая;

радуйся, неизглаголанном Твоим человеколюбием уны-
вающих ободряющая.

Радуйся, Мати Божия, Предстательнице и Заступнице на-
ша усердная.

Кондак 10

Соблюсти хотящи в чистоте домостроительство Церкви Православныя, Чистая, и утвердити скипетр державы Российския чудною иконою твоею, вложила еси в сердце благовернаго государя Михаила Феодоровича прияти венец царский земли Российския, да вси видящии видят, яко Вышний владеет царством, и емуже хочет дает е, и возопиют Ему: Аллилуия.

Икос 10

Стена еси необоримая, Богородице Дево, всем к Тебе прибегающим: никтоже бо притекаяй к Тебе тощ отходит. Сего ради ущедряеми милостию Твоею, во умилении души возглашаем Тебе:

Радуйся, твердая стено, от враг видимых и невидимых охраняющая;

радуйся, крепкая защито упование на тя возложившим.

Радуйся, познания истины чистое зеркало;

радуйся, сохранения веры крепкое забрало.

Радуйся, грады и страны христианския предстательством Твоим от врагов спасающая;

радуйся, царем благоверным поборающая.

Радуйся, мир в градах селящая;

радуйся, благонравным благопоспешающая.

Радуйся, силою молитв Твоих злыя помыслы в ничтоже обращающая;

радуйся, силы врагов ближнего сокрушающая.

Радуйся, юности наставление;

радуйся, старости поддержание.

Радуйся, Мати Божия, Предстательнице и Заступнице наша усердная.

Кондак 11

Пение всякое побеждается, спростретися тщасееся множеству многих щедрот Твоих: равночисленные бо песку морскому песни аще приносим Ти, Богородице Дево, ничтоже совершаем достойно, яже даровала еси нам вопиющим к Богу: Аллилуия.

Икос 11

Светоприемную свещу, древле явльшуюся, зрим во святей иконе Твоей, Богородице Дево, егда град Кострому защитила еси от разорения врагов земли нашае лучами, от святых твояе иконы исходящими. Сего ради с верою припадающе к ней и с любовию лобызающе ю, вопием Ти:

Радуйся, Мати, Превечнаго Света Христа, учением Его души просвещающая;

радуйся, благодатию Божиею неверующих к вере в Бога приводящая.

Радуйся, путешествующим спутешествующая;

радуйся, нужно плавающих Кормчая.

Радуйся, от всякия скорби, гнева и нужды спасающая;

радуйся, от глада, губительства, труса и огня сохраняющая.

Радуйся, избавляющая от иноплеменных;

радуйся, охраняющая от междоусобных брани.

Радуйся, в святей иконе Твоей яко солнце в Костромских пределах возсиявшая;

радуйся, zde отрасль царственную возвеличившая.

Радуйся, Тобою бо утверждаются царства;

радуйся, Тобою бо венчаются царие.

Радуйся, Мати Божия, Предстательнице и Заступнице наша усердная.

Кондак 12

Благодать приемшая от Бога Сына Твоего, Дево Богородице, и ту древле излившая на всех прибегающих к образу Твоему, не лиши ныне и нас богатия Твоея милости, даруй нам покаяние во гресех, да чистым сердцем и устны взываем к возлюбленному Сыну Твоему и Богу нашему: Аллилуия.

Икос 12

Поюще Твоя милости и чудеса, хвалим Тя вси, Богородице, и, яко древлий Израиль к Кивоту Завета, притекаем ко образу лица Твоего, и из глубины души вопием: воздвигни руце Твоя к Сыну Твоему, да подаст нам вся благая и спасительная с верою и любовью вопиющим Ти:

Радуйся, утешение наше в скорбех;

радуйся, утоление печалей наших.

Радуйся, радости наша бесконечная;

радуйся, светлосте и отрадо сердечная.

Радуйся, надеждо наша крепкая;

радуйся, сирым приятелище.

Радуйся, странным прибежище;

радуйся, обидимым покровительнице.

Радуйся, оклеветаемых оправдание;

радуйся, благих защищение.

Радуйся, тела моего врачевание;

радуйся, души моя спасение.

Радуйся, Мати Божия, Предстательнице и Заступнице наша усердная.

Кондак 13

О премилосердая Заступнице наша, великия ради милости Твоя даровавшая отечеству и граду нашему чудотворную икону Твою во освящение, утешение и ограждение наше, нынешнее приемши славословие, от всякаго злаго обстояния избави нас, рабы Твоя, даруя нам здравие и спасение, на враги победу и одоление, и всех нас вечных мук свободи, устнами, душею же и сердцем вопиющих: Аллилуия.

Этот кондак читается трижды, и снова 1й икос и 1й кондак:

Икос 1

Ангел Гавриил от Бога послан бысть во град Назарет ко Пречистой Деве Марии, и вшед к Ней рече: «Радуйся, Благодатная, Господь с Тобою, благословенна Ты в женах!» Ангельскому гласу подражающе, и мы, грешнии, радости благодарения в сердце своем исполнени, пред явленным образом Твоим благохваления наша возносить к Тебе дерзаем, Пресвятая Богородице:

Радуйся, отрасли от корене Давидова благословенная;
радуйся, обетом родителей в жертву Богу принесенная.

Радуйся, святых праведных Иоакима и Анны Дщи богоданная;

радуйся, триех лет во храм Божий введенная и тамо воспитанная.

Радуйся, тамо смирением и чистотою всех удивившая;
радуйся, тамо ангельския беседы сподобльшаяся.

Радуйся, Дево, о зачатии Бога Слова благовестие во смирении приемшая;

радуйся, избранная Отроковице, к зачатию Бога Слова силою свыше осененная.

Радуйся, тайну воплощения Сына Божия, от веков в Бозе сокровенную, открывшая;

радуйся, Агнице, рождающая Агнца Христа, взявшего грехи мира.

Радуйся, Тобою бо избавляемся мук адовых;
радуйся, Тобою бо сподобляемся вечныя жизни.

Радуйся, Мати Божия, Предстательнице и Заступнице наша усердная.

Кондак 1

Взбранной Воеводе, Пренепорочней Деве Богородице, Заступнице нашей и предстательству христиан непостыдному, явлением чудныя иконы Своея радование подавшей земле Российстей и вся верная чада Церкви просветившей, благодарение усердно приносим Ти, Богородице, и припадающе пречудному образу Твоему, умильно глаголем: спаси, Госпоже, и помилуй рабы Твоя, зовущия:

Радуйся, Мати Божия, Предстательнице и Заступнице наша усердная.

Молитва

О Пресвятая Владычице Богородице и Приснодево Марие, единая надеждо нам грешным! К Тебе прибегаем и Тебе молим, яко велие имаши дерзновение пред рождшимся от Тебе по плоти Господем Богом и Спасителем нашим Иисусом Христом. Не презри слез наших, не возгнушайся воздыханий наших, не отрини скорби нашея, не посрами упования нашего на Тя, но Матерними молении Твоими умоли Господа Бога, да сподобит нас грешных и недостойных свободитися от грехов и страстей душевных и телесных, умрети миру и жити Ему единому по вся дни живота нашего. О Пресвятая Владычице Богородице, путешествующим спутешествуй и ограждай и охраняй оныя, избави плененных от пленения, свободи страждущих от бед, утеши сущих в печали, скорбех и напастех, облегчи нищету и всяко злострадание телесное, и даруй всем вся потребная к животу, благочестию и жизни временней. Спаси, Владычице, вся страны и грады и сию страну и сей град, имже сия чудотворная и святая икона Твоя дадесе во утешение и ограждение; избави я от глада, губительства, труса, потопа, огня, меча, нашествия иноплемennых, междоусобных брани, и отврати всякий гнев, на ны праведно движимый. Даруй нам время на покаяние и обращение, избави нас от внезапной смерти, и во время исхода нашего предстани нам явльшися, Дево Богородице, и изба-

ви нас от воздушных мытарств, князей века сего, сподоби на Страшнем Судищи Христовем стати одесную, и соделай нас наследники вечных благ, да славим во веки великолепое имя Сына Твоего и Бога нашего со Безначальным Его Отцем и Святым и Благим и Животворящим Его Духом, ныне и присно и во веки веков. Аминь.

Текст акафиста приводится по следующему изданию: «Радуйся, Невесто Неневестная!»: 60 акафистов Божией Матери и Ее чтимым иконам. – Свято-Троицкая Сергиева Лавра, 2000. – С. 574–583. – По благословению святейшего Патриарха Московского и всея Руси Алексия II.



Икона Пресвятой Богородицы «Помощница в родах»

Акафист Пресвятой Богородице в честь иконы Ее, именуемой «Помощница в родах»

Кондак 1

Избранней от всех родов Предстательнице рода христианского, благодарственная пения приносим Ти, Богородице, о даровании чудных иконы Твоея. Ты же, яко скорая и все-милостивая верных Заступница, не остави нас в скорбех, да зовем Ти:

Радуйся, Благодатная Помощнице в родах, на помощь к нам ускоряющая.

Икос 1

Ангел предстатель послан бысть рещи Богородице: «Радуйся!», егда Бог Слово воплощашеся во утробе Ея; и мы, грешнии, дивящиеся явлению чудныя Ея иконы, с верою и надеждою вопием:

Радуйся, Дево, христиан похвало;

радуйся, яко Тя блажат вси роди.

Радуйся, скорби земныя со смирением претерпевшая;

радуйся, материнскую любовь нам являющая.

Радуйся, болезни рождения в радость претворяющая;

радуйся, Твоею любовью нас на Небеса возводящая.

Радуйся, чудным рождением Твоим праведных родителей Своих возвеселившая;

радуйся, сим весь мир радости исполнившая.

Радуйся, Благодатная Помощнице в родах, на помощь к нам ускоряющая.

Кондак 2

Видящи, Всенепорочная, во славе Сына Своего пребывающая, яко скорби и уныния в сердцах людей умножишася, благоволила еси явити икону Твою, чудесы ю прославляющие, да покрываемы Твоею любовью, с надеждою вопием Богу: Аллилуия.

Икос 2

Жизнодателя рождшая, Пресвятая Богородице, благодатное попечение о женах, родити имущих, прияла еси, да познаем, что есть воля Божия о нас благая и совершенная. Мы же, дивящиеся свыше данному нам благодатному укреплению, со слезами радости вопием Ти:

Радуйся, вразумлением Твоим от грехов нас отвращающая;

радуйся, славою чудес Твоих верных разум озаряющая.

Радуйся, сердца наша любовью Твоею умягчающая;

радуйся, молитвами Твоими милосердие Сына Твоего к нам приклоняющая.

Радуйся, скорби наша утворяющая;

радуйся, жен христианских в родах не оставляющая.

Радуйся, и в духовном рождении всех благословляющая;

радуйся, светом Сына Твоего всех просвещающая.

Радуйся, Благодатная Помощнице в родах, на помощь к нам ускоряющая.

Кондак 3

Силу сугубыя благодати явила еси, Владычице, чудотворному образу Твоему «Помощница в родах» именуемому, да вси, чада родити имущии, под осенение Твоея иконы с молитвою прибегают, Богу же вопиют: Аллилуия.

Икос 3

Имуще Тя, Заступнице усердная рода христианского, яко Матерь о чадах Своих пекущуюся, с верою и любовью к Тебе притекаем и молитвы наша пред иконою Твоею возносяще, вопием Ти сице:

Радуйся, явлением образа Твоего мглу лютых обстоятельств отгоняющая;

радуйся, православныя люди иконою Твоею утешающая.

Радуйся, болезни родити имущих облегчающая;

радуйся, любовь Твою всегда нам источающая.

Радуйся, в скорбех нас не оставляющая;

радуйся, любящим Сына Твоего молитвенное попечение дарующая.

Радуйся, на путь спасения наставляющая;

радуйся, злыя страсти наша укрощающая.

Радуйся, Благодатная Помощнице в родах, на помощь к нам ускоряющая.

Кондак 4

Бури житейския избегающе, в тихое пристанище под осение Твоя иконы вернии притекают, наипаче же жены, родити чада имущия, мольбы своя пред тою возносят, Богу же, вся во благо устрояющему, зовут: Аллилуия.

Икос 4

Слышавше православнии людие о чудесех, от иконы Твоея «Помощница в родах» бываемых, возрадовашася зело, и всю надежду на Тя возлагающе, вопияху таковая:

Радуйся, семейства благочестивая благословляющая;
радуйся, миром и любовью сия ограждающая.

Радуйся, чад наших назирающая;
радуйся, благодатным Твоим покровом младенцев осеняющая.

Радуйся, юность нашу светом истины просвещающая;
радуйся, ум наш в горняя возносящая.

Радуйся, целомудрия Наставнице;
радуйся, чистоты Хранительнице.

Радуйся, Благодатная Помощнице в родах, на помощь к нам ускоряющая.

Кондак 5

Боготечная звезда явися икона Твоя, Богомати Пречистая, сущих в болезнях и скорбех радостию осияваючи, заблуждающих же на путь делания заповедей Сына Твоего и Бога наставляючи, Емуже благодарне вопием: Аллилуия.

Икос 5

Видевше токи чудес, от святыя иконы Твоея «Помощница в родах» источаемыя, вси вернии людие стекахуся к ней на поклонение. Ты же, Мати Божия, всем дары милости Твоея неоскудно подаеши от чудотворнаго Твоего образа, подвизающи вопити Тебе сице:

Радуйся, Мати милосердия и щедрот;

радуйся, Безплотнаго воплотившая.

Радуйся, Бога с человеки соединившая;

радуйся, верных Господеви сочетававшая.

Радуйся, несумненною надеждою сердца наша исполняющая;

радуйся, хладность душевную благодатию согревающая.

Радуйся, добродетелей стяжание;

радуйся, Божие к немощным благоволение.

Радуйся, Благодатная Помощнице в родах, на помощь к нам ускоряющая.

Кондак 6

Проповедающе чудеса Твоя, Богородительнице, от иконы Твоея «Помощница в родах» бываемая, молим Тя, Пречистая: избави вся жены, чревоносящая чада своя, от тяжкаго рождения, подвизающи их же и нас воспевати Богу: Аллилуия.

Икос 6

Возсия, Пречистая Богородице, чудная икона Твоя «Помощница в родах» родителем на утешение и всем нам на помощь и спасение. Сего ради, взирающе на ню, мольбы своя Тебе приносим, благодарно зовуще:

Радуйся, от внезапныя смерти всех избавляющая;
радуйся, мрачных духов далече от нас отгоняющая.

Радуйся, отступления наша любовью Твоею покрывающая;

радуйся, к долготерпению в скорбех и недугех нас призывающая.

Радуйся, истинно молитися нас научающая;
радуйся, вся благая прошения наша исполняющая.

Радуйся, благодарственные дары не отвергающая;
радуйся, сердца благочестивых людей возвеселяющая.

Радуйся, Благодатная Помощнице в родах, на помощь к нам ускоряющая.

Кондак 7

Хотяй всем человеком спастися, Премилосердный Господь усынови нас Матери Своей: да будет печальным утешительницею, болящим целительницею, заблуждшим наставницею, да всех из глубины греховныя изведет, вопиющих: Аллилуия.

Икос 7

Дивна показал еси дела Твоя в Пречистой Матери Твоей,
Господи, и дивну даровал еси нам Ея икону, да вси взираю-
щие на сию, песненно превозносят Честнейшую Херувим и
Славнейшую Серафим пении сими:

Радуйся, неприступного Божества селение;

радуйся, ангельское непрестанное удивление.

Радуйся, Божия милости и любви исполнение;

радуйся, Подательнице спасительного в родах вспоможе-
ния.

Радуйся, правды святых Попечительнице;

радуйся, наша пред Сыном Твоим Споручнице.

Радуйся, неизменная наша Надежда;

радуйся, тихое и доброе пристанище.

Радуйся, Благодатная Помощнице в родах, на помощь к
нам ускоряющая.

Кондак 8

Странно и сумнительно неверующим слышати, како образ Твой святой, Богомати Пречистая, токи благодати источает. Мы же, о всех благодеяниях Твоих, от иконы Твоея бываемых, добре ведуще, благодарно вопием Богу: Аллилуия.

Икос 8

Все упование свое жены, родити чада имущия, на Тя, Владычице, возлагают. Приклонися убо к немощем человеческим – кто бо нас от рова погибели изведет, аще не Ты, о Богомати? Сего ради пред Твоим пречистым образом вопием Ти тако:

Радуйся, отчаянных надеждо;

радуйся, скорбящих утешение.

Радуйся, обуреваемых пристанище;

радуйся, болящих исцеление.

Радуйся, немощных подкрепление;

радуйся, унывающих ободрение.

Радуйся, вдов заступление;

радуйся, сирых призрение.

Радуйся, Благодатная Помощнице в родах, на помощь к нам ускоряющая.

Кондак 9

Всякаго естества ангельскаго превысшая явилася еси, Пресвятая Дево: Бога бо зачала еси плотию, Невместимаго всеми вместила еси во утробе Твоей; темже, яко Матерь Божию величающе Тя, вопием о Тебе Создателю нашему: Аллилуия.

Икос 9

Ветии человечестии недоумеют восхвалити по достоянию славное, Владычице, иконы Твоея явление, ниже мы, грешнии, от скверных устен наших возможем принести достойное похваление Тебе, Заступнице нашей. Обаче, неисчетная чудеса, иконою Твоею являемая, видевшие, радующеся вопием Ти:

Радуйся, благочестия Наставнице;
радуйся, в добрых делах Помощнице.
Радуйся, добрыя обеты приемлющая;
радуйся, благим намерениям способствующая.
Радуйся, злая начинания разрушающая;
радуйся, вражия козни расторгающая.
Радуйся, всему благу вход отверзающая;
радуйся, чадородие благословляющая.

Радуйся, Благодатная Помощнице в родах, на помощь к нам ускоряющая.

Кондак 10

Спасти хотящи многия жены, чада раждающия, от обдержавших их болезней и напастей, чудную икону Твою, Богомати, даровала еси, еяже ради козни диавольския разрушаются, смертоносныя болезни отступают, недужи ослабевают, да вси, видяще являемую Тобою милость, вопиют со умилением Богу: Аллилуия.

Икос 10

Стена еси и прибежище, Богомати, людем страждущим и всем усердно к Тебе прибегающим. Сего ради от лет древних вси скорбящие и обремененнии, всю надежду на Тя возлагающе, к помощи Твоей притекают, пред честною иконою вопиюще Тебе сице:

Радуйся, прославляющих Тя от бед избавляющая;
радуйся, не чтущих Тя посрамляющая.

Радуйся, чудесы Твоими всех просвещающая;
радуйся, моления наша во благо исполняющая.

Радуйся, яко невидимых врагов от нас отгоняеши;
радуйся, яко от видимых врагов нас избавляеши.

Радуйся, ищущих Твоего предстательства спасающая;
радуйся, матери и чада сугубою любовью Твоею покрывающая.

Радуйся, Благодатная Помощнице в родах, на помощь к нам ускоряющая.

Кондак 11

Пение всеумиленное приими от нас, Небесная Царице, и молитву, приносимую Тебе, услыши: к Тебе бо в напастех и скорбех прибегаем и пред Тобою в бедах наших слезы проливаем и молим: помози нам, и приими сию жертву Твоих рабов, зовущих: Аллилуия.

Икос 11

Светоприемная свеща истинного Света сущим нам на земли явльшися, Богородительнице, души просвещаеши чтущих Твоея иконы явление, в вере наставляеши, и младенцев во утробах матерей охраняеши, и молишися о всех поющих Ти сицевая:

Радуйся, ненадеющихся несумненной надеждою возвесе-
ляющая;

радуйся, свеще, у престола Божия присно горящая.

Радуйся, лампадо, елеем Божественным светящая;

радуйся, вход в Царство Небесное нам, грешным, отвер-
зающая.

Радуйся, свете лучезарный, пути жизни нам указующий;

радуйся, храме одушевленный, всех нас освящающий.

Радуйся, любвию Твоею всех объемлющая;

радуйся, покровом Твоим всех покрывающая.

Радуйся, Благодатная Помощнице в родах, на помощь к
нам ускоряющая.

Кондак 12

Благодать Божия, присущая святей иконе Твоей, «Помощница в родах» именуемой, Богомати Владычице, влечет к ней всех, помощи Твоя просящих, и не тщи отходят они от сего источника многообразных Твоих милостей и щедрот, но вся душам и телесем благопотребная неоскудно получают, аще по Бозе все упование на Тя возложат, поюще: Аллилуия.

Икос 12

Поюще Твоя чудеса, бывшая в древняя и настоящая времена, хвалим Тя, Богородице, яко твердую Предстательницу нашу: веруем бо, яко испросиши у Сына Твоего благая вечная и временная всем с любовью вопиющим Тебе сице:

Радуйся, скорбящих Радосте;

радуйся, погибших Взыскание.

Радуйся, Всеблагая Скоропослушнице;

радуйся, грешных Споручнице.

Радуйся, Неопалимая Купино;

радуйся, Нерушимая Стено.

Радуйся, Живоносный Источниче;

радуйся, Цвете Неувядаемый.

Радуйся, Благодатная Помощнице в родах, на помощь к нам ускоряющая.

Кондак 13

О Всепетая Мати, Помощнице в родах, рождающая всех святых Святейшее Слово! Нынешнее наше приемши приношение, от всякия избави напасти всех, и будущия изми муки о Тебе вопиющих: Аллилуия.

Этот кондак читается трижды, и снова 1-й икос и 1-й кондак:

Икос 1

Ангел предстатель послан бысть рещи Богородице: «Радуйся!», егда Бог Слово воплощашеся во утробе Ея; и мы, грешнии, дивящиеся явлению чудныя Ея иконы, с верою и надеждою вопием:

Радуйся, Дево, христиан похвало;

радуйся, яко Тя блажат вси роди.

Радуйся, скорби земныя со смирением претерпевшая;

радуйся, материнскую любовь нам являющая.

Радуйся, болезни рождения в радость претворяющая;

радуйся, Твоею любовью нас на Небеса возводящая.

Радуйся, чудным рождением Твоим праведных родителей Своих возвеселившая;

радуйся, сим весь мир радости исполнившая.

Радуйся, Благодатная Помощнице в родах, на помощь к нам ускоряющая.

Кондак 1

Избранней от всех родов Предстательнице рода христианскаго, благодарственная пения приносим Ти, Богородице, о даровании чудныя иконы Твоея. Ты же, яко скорая и все-милостивая верных Заступница, не остави нас в скорбех, да зовем Ти:

Радуйся, Благодатная Помощнице в родах, на помощь к нам ускоряющая.

Молитва

Приими, Госпоже Богородительнице, слезная моления рабов Твоих, к Тебе притекающих. Зрим Тя на святей иконе во чреве носящую Сына Твоего и Бога нашего, Господа Иисуса Христа: аще и безболезненно родила еси Его, обаче матерния скорби веси и немощи сынов и дщерей человеческих зриши. Темже тепле припадающе к цельбоносному образу Твоему, и умиленно сей лобызающе, молим Тя, Всемиловитая Владычице: нас, грешных, осужденных в болезнях родити и в печалех питати чада наша, милостивно пощади и сострадательно заступи, младенцы же наша, такожде и родившая их, от тяжкаго недуга и горькия скорби избави. Даруй им здравие и благопомощие, да и питаеми от силы в силу возрастати будут, и питающих их исполнятся радостию и утешением, яко да и ныне предстательством Твоим из уст младенцев и ссуших Господь совершит хвалу Свою. О Мати Сына Божия! Умилосердися на матери сынов человеческих и на немощныя люди Твоя: постигающия нас болезни скоро исцели,лежащия на нас скорби и печали утоли, и не презри слез и воздыханий рабов Твоих. Услыши нас в день скорби, пред иконою Твоею припадающих, и в день радости и избавления приими благодарная хваления сердец наших. Вознеси мольбы наша ко Престолу Сына Твоего и Бога нашего, да милостив будет ко грехом и немощем нашим и пробавит

милость Свою ведущим имя Его, яко да и мы, и чада наша, прославим Тя, милосердную Заступницу и верную Надежду рода нашего, во веки веков. Аминь.

Текст акафиста приводится по следующему изданию: Акафист Пресвятой Богородице в честь иконы Ея «Помощница в родах». – Херсон, 2011. – По благословению архиепископа Херсонского и Таврического Иоанна. Акафист на момент издания не имеет общецерковного утверждения.



Икона Пресвятой Богородицы «Помощница в родах»



Икона Пресвятой Богородицы «Млекопитательница»

Акафист Пресвятой Богородице в честь иконы Ее, именуемой «Млекопитательница»

Кондак 1

Избранней от дочерей человеческих Материю быти Христа Бога нашего принесем от любви нашае песни хвалебныя; Ты же, Сына Божия неизреченно родившая и яко Младенца млеком питавшая, сохрани нас, поющих Тя, от обышедших нас зол, скорбей и напастей, да зовем Ти немолчно:

Радуйся, Богородице Дево Млекопитательнице, милостию Твоею нас присно питающая.

Икос 1

Ангелов лица в вертеп приникнувшие и узревше тамо Деву чистую, Сына млеко питающую, возопиша Тебе, Благословенней:

Радуйся, рождшая мира Творца;

радуйся, питающая Питателя вселенныя.

Радуйся, пеленами повивающая Повивающаго небо облаки;

радуйся, дланьми носящая на Херувимех носимаго.

Радуйся, яко Детищ мал Тобою родися;

радуйся, яко Младенец плачущ и мирови радость даяй Тобою в мир прииде.

Радуйся, Богородице Дево, Млекопитательнице, милостию Твоею нас присно питающая.

Кондак 2

Видящи Святая Дева при персех Своих Богомладенца лежаща, глагола Ему: како возмогу Тя питати, Творца Моего, Ему же вся воинства небесная вопиют: Аллилуия.

Икос 2

Разумная вся тварь недоразумевает, како и Дева пребы-
ваеши, и Младенца млеком питаеши. Обаче, неизреченному
таинству сему верующе, благоговейно взываем:

Радуйся, Дево неблазная;

радуйся, Девице прекрасная.

Радуйся, жен украшение;

радуйся, Мати чистая.

Радуйся, дев правило;

радуйся, Благословенная в женах.

Радуйся, Богородице Дево, Млекопитательнице, мило-
стию Твоею нас присно питающая.

Кондак 3

Сила Вышняго осени Тя, Богородице Дево, и подаде Ти крепость повити и питати, Егоже вси концы земли величают и поют Ему песнь великую: Аллилуия.

Икос 3

Имущи дерзновение велие к Рожденному от Тебе, призри на скорби и беды, нас обышедшия, умоли Питаемого Тобою за ны грешныя и недостойныя, да избавышеся от лютых напастей, возглаголем Ти тако:

Радуйся, рождшая сладчайшее Утешение наше;
радуйся, произрастившая Благословеннаго благодатию.

Радуйся, Мати наша всеблагая;

радуйся, чадами Твоими нас нарекшая.

Радуйся, благонадежное наше прибежище;

радуйся верных небурное пристанище.

Радуйся, Богородице Дево, Млекопитательнице, милостию Твоею нас присно питающая.

Кондак 4

Буря скорбей и напастей обдержит ны, трепещем, да не потонем в мори житейстем, но явися нам, яко голубица Ноева, ветвь надежды подаючи нам, вопиющим Богу: Аллилуия.

Икос 4

Слышащи жена благоразумная глаголы живота вечного, Сыном Твоим вещаемая, прослави Тя, вопиющи Ему: «Благословенно чрево, носившее Тя, и сосца, питавшая Тя»; тем же приими и наша немощныя похвалы сицевыя:

Радуйся, бисере драгий, всечудная Мати;
радуйся, велия в женах.

Радуйся, ветвь присноцветущая;
радуйся, животе, приемляй Сокровище освящения.

Радуйся, чаше золотая, Христа, небесную Манну, носящая;
радуйся, Хлебом Жизни нас возраждающая.

Радуйся, Богородице Дево, Млекопитательнице, милостию Твоею нас присно питающая.

Кондак 5

Богоносная руце Твоя, Всепетая, простри к нам немощным, воздвигни нас унылых, спаси отчаянных, да в радости душевной, ничимже смущаемой, вопием Сыну Твоему: Аллилуия.

Икос 5

Виде Тя в Дусе богоглаголивый Исаия, яко имаши, Дева
сущи, во чреве прияти Рожденнаго из Тебе, возгласи Ти:

Радуйся, Предвечнаго рождшая;

радуйся, яко Тобою с нами Бог бывает.

Радуйся, пророчеств сбытие;

радуйся, пророков веселие.

Радуйся, всего мира чаяние;

радуйся, рода нашего утешение.

Радуйся, Богородице Дево, Млекопитательнице, мило-
стию Твоею нас присно питающая.

Кондак 6

Проповедницы присноглаголемии Твоего милосердия
суть чудеса многообразная, источаемая от иконы Твоея свя-
тыя, яже обильно нам даровала еси, да покланяющися Тебе
и Богомладенцу Христу, вопием гласы хвалебными: Алли-
луия.

Икос 6

Возсия во обители Саввы Освященного, яко солнце светозарное, всечестная икона Твоя, Млекопитательница именуемая, пред неюже преподобный со иноки выну прославляху Тя, вопиюще:

Радуйся, обители наша пречудное украшение;

радуйся, от врагов видимых и невидимых твердое заступление и защищение.

Радуйся, молениям нашим присно внимлющая;

радуйся, прошения наша благоутробно приемлющая.

Радуйся, горестная воздыхания наша утишающая;

радуйся, слезы наша отирающая.

Радуйся, Богородице Дево, Млекопитательнице, милостию Твоею нас присно питающая.

Кондак 7

Хотя преподобный Савва отыти в жизнь вечную, пророчески рече, яко по мнозех днех приидет во обитель сию царев сын, ему тезоименитый, сей приимет святую икону Владычицы во благословение и воспоет радуясь: Аллилуия.

Икос 7

Новый угодник Савва, святитель Сербския земли, прииде во обитель древнюю, и прият по словеси преподобнаго святую икону, и принесе ю на гору Афонскую во обитель Хиландарскую, вси же насельницы ея радостно взываху ко Владычице мира:

**Радуйся, присно о нас грешных промышляющая;
радуйся, николиже нас убогих забывающая.**

Радуйся, милость Твою тысящекратно во святых чудотворных иконах Твоих обновляющая;

радуйся, новая знамения щедрот Твоих ныне изливающая.

**Радуйся, любящих и чтущих Тя зело возлюбившая;
радуйся, молящих Ти ся николиже посрамляющая.**

Радуйся, Богородице Дево, Млекопитательнице, милостию Твоею нас присно питающая.

Кондак 8

Странное чудо и недоразумеваемое есть неверным и сумудренным, како от иконы Твоея чудеса истекают; мы же, многократными милостями в сем утверждении, пети Господу Богу, даровавшему таковую Помощницу роду христианскому, дерзаем: Аллилуия.

Икос 8

Весь мир видимый и невидимый блажит Тя, Богородице Дево, яко усердную Заступницу нашу, присно помогающую нам, в море бед и скорбей погибающим, да Тебе, единей нашей надежде, вопием:

**Радуйся, Сына Твоего за нас грешных умоляющая;
радуйся, в бедах и обстояниях скоро помогающая.**

**Радуйся, молений наших скорое услышание;
радуйся, горестей жития нашего верное услаждение.**

**Радуйся, веру нашу укрепляющая;
радуйся, крест жизни нашея понести нам помогающая.**

Радуйся, Богородице Дево, Млекопитательнице, милостию Твоею нас присно питающая.

Кондак 9

Всяко убожая Тя, Всеблагая, Иоанн Дамаскин рече, яко удобее молчание, неже пети Тя, но любовию понуждаемии, восхваляем Тя и поем Сыну Твоему песнь великую: Аллилуия.

Икос 9

**Витийствовати не хоцем, но с любовию и слезами прите-
каем к Тебе, яко Матери чадолюбивой, и из глубины сердца
вопием:**

Радуйся, Радосте наша неизреченная;

радуйся, Утешение наше несказанное.

Радуйся, домов наших ограждение;

радуйся, чад наших покрове.

Радуйся, младенцев воспитание;

радуйся, юных от путей гибельных охранение.

**Радуйся, Богородице Дево, Млекопитательнице, мило-
стию Твоею нас присно питающая.**

Кондак 10

Спасти всех нас и хоцещи и можещи, Пресвятая Дево, аще прибегаем ко всечестному Покрову Твоему, сего ради молим Тя: избави нас от горьких бед и скорбей, нашедших на ны, привлецы сердца наша ко благостному прибежищу и научи вопити Богу, из Тебе рождшемуся: Аллилуия.

Икос 10

Стену нерушиму Тя нарицаем и вемы, яко истину глаголем, уведехом бо, яко зело любиши род христианский, милости и щедроты Твоя присно источаеши вопиющим Тебе:

Радуйся, от сетей вражиих нас охраняющая;

радуйся, от навета злых человек нас спасающая.

Радуйся, вражду сродник наших на любовь пременяющая;

радуйся, мир и тишину в домах наших сохраняющая.

Радуйся, намерениям благим вспомоществующая;

радуйся, советы благия на сердце полагающая.

Радуйся, Богородице Дево, Млекопитательнице, милостию Твоею нас присно питающая.

Кондак 11

Пение всякое принесоша Ти, Пренепорочная, пророцы, предзревше безсеменное зачатие и рождение от Тебе Сына Божия; пастырие же и волсви, видевше Тя рождшую и питавшую, и вси людие хвалят Тя. Веруем, яко до скончания века не умолкнет песнь хвалебная от рода христианскаго Рожденному Тобою: Аллилуия.

Икос 11

Светило светозарное Ты еси, Пречистая, нам во тьме грехов и страстей погибающим, просвещающее наша темныя очи, сердце озаряющее высшим разумом, поющее Тя:

Радуйся, Путь, Истину и Жизнь рождающая;

радуйся, истинному Богу нас вручающая.

Радуйся, светом Евангелия наша мрачныя души озаряющая;

радуйся, мудрость века сего ни во чтоже вменяющая.

Радуйся, мудрость превysочайшую, яже есть любовь, в сердцах наших насаждающая;

радуйся, помощи всем и во всем.

Радуйся, Богородице Дево, Млекопитательнице, милостию Твоею нас присно питающая.

Кондак 12

Благодать Божия явился чудно в земли Российстей от подобию иконы Твоея Млекопитательницы. Темже и гора Афонская, и страна наша, ныне люте страждущая, но на милость Твою несуменно уповающая, вопиют милосердому Богу: Аллилуия.

Икос 12

Поюще Тя, яко Спаса нашего родившую, и пеленами по-
вившую, и млеком питавшую, уповаем, яко никоеже Твое
прошение безответно от Него пребудет, понеже Сам Слад-
чайший Иисус обеща ти тако; имуще в сем твердую надежду,
восхваляем Тя, Отрадо и Утешение наше:

Радуйся, лютыя скорби в радость претворяющая;
радуйся, ожесточение сердец наших любовью Твоею
умягчающая.

Радуйся, любити Бога и ближняго нас научающая;
радуйся, в скорбех наших упование на Бога возлагати на-
ставляющая.

Радуйся, наша хладныя молитвы любовью Твоею согре-
вающая;

радуйся, молитвы нас грешных и недостойных яко мило-
стивая Мати приемлющая.

Радуйся, Богородице Дево, Млекопитательнице, мило-
стию Твоею нас присно питающая.

Кондак 13

О Всехвальная Богородице Дево, нашего Господа и Владыку млеко питавшая, не презри сего малаго моления нашего, но умоли Сына Твоего, да дарует нам грехов прощение, болезней исцеление, да сохранит нас от глада, мраза, смертоносных язвы, нечаянных смерти и от всех бед и обстояний, да избавышеся сих, радуящеся зовем Ему: Аллилуия.

Этот кондак читается трижды, и снова 1й икос и 1й кондак:

Икос 1

Ангелов лица в вертеп приникнувшие и узревше тамо Деву чистую, Сына млеко питающую, возопиша Тебе, Благословенней:

Радуйся, рождшая мира Творца;

радуйся, питающая Питателя вселенныя.

Радуйся, пеленами повивающая Повивающаго небо облаки;

радуйся, дланьми носящая на Херувимех носимаго.

Радуйся, яко Детищ мал Тобою родися;

радуйся, яко Младенец плачущ и мирови радость даяй Тобою в мир прииде.

Радуйся, Богородице Дево, Млекопитательнице, милостию Твоею нас присно питающая.

Кондак 1

Избранней от дщерей человеческих Материю быти Христа Бога нашего принесем от любви нашея песни хвалебныя; Ты же, Сына Божия неизреченно родившая и яко Младенца млеком питавшая, сохрани нас, поющих Тя, от обышедших нас зол, скорбей и напастей, да зовем Ти немолчно:

Радуйся, Богородице Дево Млекопитательнице, милостию Твоею нас присно питающая.

Молитва

Приими, Госпоже Богородительнице, слезная моления рабов Твоих, к Тебе притекающих. Зрим Тя на святей иконе, на руках носящую и млеко питающую Сына Твоего и Бога нашего, Господа Иисуса Христа. Аще и безболезненно родила еси Его, обаче матерния скорби веси и немощи сынов и дщерей человеческих зриши. Темже тепле припадающе к цельбоносному образу Твоему и умиленно сей лобызающе, молим Тя, всемилостивая Владычице: нас, грешных, осужденных в болезнях родити и в печалех питати чада наша, милостивно пощади и сострадательно заступи, младенцы же наша, такожде и родившие их, от тяжкаго недуга и горькия скорби избави. Даруй им здравие и благомощие, да и питаемии от силы в силу возрастати будут, и питающих их исполнятся радостию и утешением, яко да и ныне предстательством Твоим из уст младенцев и ссуших Господь совершит хвалу Свою. О Мати Сына Божия! Умилосердися на матери сынов человеческих и на немощныя люди Твоя: постигающия нас болезни скоро исцели, належащия на нас скорби и печали утоли, и не презри слез и воздыханий рабов Твоих. Услыши нас в день скорби пред иконою Твоею припадающих, и в день радости и избавления приими благодарная хваления сердец наших. Вознеси мольбы наша ко престолу Сына Твоего и Бога нашего, да милостив будет ко грехом

и немощем нашим и пробавит милость Свою ведущим имя Его, яко да и мы, и чада наша прославим Тя, милосердную Заступницу и верную надежду рода нашего, во веки веков. Аминь.

Текст акафиста приводится по следующему изданию: «Радуйся, Невесто Неневестная!»: 60 акафистов Божией Матери и Ее чтимым иконам. – Свято-Троицкая Сергиева Лавра, 2000. – С. 574–583. – По благословению святейшего Патриарха Московского и всея Руси Алексия II. *Акафист на момент издания не имеет общецерковного утверждения.*



Икона Пресвятой Богородицы «Млекопитательница»



Икона Пресвятой Богородицы «Воспитание»

Акафист Пресвятой Богородице в честь иконы Ее, именуемой «Воспитание»

Кондак 1

Взбранной Воеводе и благой Воспитательнице рода христианского, яко избавльшися от злых, благодарственная восписую Ти, раба твоя, Богородице; но яко имущая державу непобедимую, от всяких бед чадое мое свободи, со слезами бо зову Ти:

Воспитай, Владычице, чадое мое (*имя*) достойным Небесного Царствия и наследником вечных благ его сотвори.

Икос 1

Ангела с небесе послати чаду моему исходатайствуй, Пресвятая, у Сына Твоего и Бога, якоже и Тебе послан бысть хранитель прекрепкий, Гавриил Архангел, и сподоби мя взывати Тебе сице:

Воспитай чадо мое земным ангелом;

воспитай чадо мое небесным человеком.

Воспитай чадо мое Тебе угодным;

воспитай чадо мое сокрушенным духом и сердцем.

Воспитай чадо мое Твоим рабом;

воспитай чадо мое зовущим Тебе:

«Радуйся, Благодатная, Господь с Тобою!»

Воспитай, Владычице, чадо мое (*имя*) достойным Небесного Царствия и наследником вечных благ его сотвори.

Кондак 2

Видящи мое матернее моление о чаде моем к Тебе единой, Владычице, приими его под Твой честный и милосердный покров, да воззовет Богу: Аллилуия.

Икос 2

Разум чаду моему послѣ, еже како добре Ти послужити, и исполни сердце его премудростию небесною, научающи сию едину возлюбити, земная же презирати, и не возбрани устом моим вопити таковая:

Воспитай чадо мое мудрым, якоже змѣя, и простым, яко голубѣе;

воспитай чадо мое имущим разум на благое и не имущим на грех.

Воспитай чадо мое премудрым противу козней диавольскихъ;

воспитай чадо мое устрояющим мудре житіе свое по образу святыхъ.

Воспитай чадо мое, питающи его млеко премудрости Божія сокровенныя;

воспитай чадо мое, да взыскует премудрость сию во всем житіи своемъ.

Воспитай, Владычице, чадо мое (*имя*) достойнымъ Небеснаго Царства и наследникомъ вечныхъ благъ его сотвори.

Кондак 3

Сила Вышняго да осенит чадое мое Твоего ради неусыпнаго предстательства пред Сыном Твоим, да познав Твое матернее милосердие ко всем, притекающим к Богу с верою, воззовет Ему: Аллилуия.

Икос 3

Имущи от Бога чадо мое, не хочу узрети его в муке вечной пребывающа, но паче записанным в книзе жизни и наследующим живот вечный. Сего ради, Пречистая Дево, приклони ухо к молению моему, взываю Тебе:

Воспитай чадо мое, да избегнет вечных мук;
воспитай чадо мое, да наследует живот вечный.

Воспитай чадо мое, да проходит путь жития в покаянии;
воспитай чадо мое, да потщится претрудно стяжати благодать Духа Святаго.

Воспитай чадо мое, да попечется усиленно восхитити Царствие Небесное;

воспитай чадо мое, еже быти ему записанным в книгу жизни.

Воспитай, Владычице, чадо мое (*имя*) достойным Небесного Царствия и наследником вечных благ его сотвори.

Кондак 4

Бурю внутрь имущи помышлений сумнительных, видящи соблазнов множества, желающи же чаду моему внити в живот вечный, рыдаю; воспомянувши же Твоя милости пребогатая, во уповании и умилении сердца пою Сыну Твоему: Аллилуия.

Икос 4

Слышаши глас Твой, глаголющий Сыну Твоему: «Данных Мне Тобою в удел сохраняй во веки», – простираю руце мои и сердце к Твоему милосердию, да возмешь чадо мое в рабы Твоя и исполниши прошения моя таковая:

Воспитай чадо мое в уделе Твоем пресвятом;
воспитай чадо мое со всеми избранными Твоими.

Воспитай чадо мое рабом, творящим вся Божия повеления;

воспитай чадо мое шествующим узким путем заповедей Сына Твоего во Иерусалим Горний.

Воспитай чадо мое ищущим помощи у Тебе единыя;
воспитай чадо мое к животу вечному.

Воспитай, Владычице, чадо мое (*имя*) достойным Небесного Царствия и наследником вечных благ его сотвори.

Кондак 5

Боготечная звезда утренняя, Сын Твой, Пресвятая Дево,
да возсияет свет невечерний в сердце чада моего, во еже воз-
звати ему Богу: Аллилуия.

Икос 5

Видящи мое прилежное моление, возносимое Тебе, приими сие яко фимиам благовонный и не отврати лица Твоего от моего чада, аще и отвратится сей (*или сия*) от Тебе, но паче услыши глаголы уст моих, вопиющих Тебе:

Воспитай чадо мое нищим духом, да внидет в Царство Небесное;

воспитай чадо мое плачущим, да утешится.

Воспитай чадо мое кротким, да наследит землю;

воспитай чадо мое алчущим и жаждущим правды, да насытится.

Воспитай чадо мое милостивым, да помилует его Господь; воспитай чадо мое чистым сердцем, да Бога узрит.

Воспитай чадо мое миротворцем, да чадом Божиим наречется;

воспитай чадо мое радующимся в лишениях и поношениях, да улучит мзду свою.

Воспитай, Владычице, чадо мое (*имя*) достойным Небесного Царствия и наследником вечных благ его сотвори.

Кондак 6

Проповедует мир весь христианский Твое всегдашнее заступление сирот, вдовиц и матерей, о чадах своих молящихся и вопиющих Богу: Аллилуия.

Икос 6

Возсияй лучу благодати в душе чада моего, да, просвещенный от Тебе свыше, узрит путь, ведущий в живот вечный, и последует им, сохраняемый под Твоим всемогущим покровом, в Царство Сына Твоего, идеже жизнь безконечная, и сего ради услыши мя, зовущую Тебе сице:

Воспитай чадо мое светом мира, да светит свет его пред людьми, и да видяще его добрая дела, прославят Отца Небесного;

воспитай чадо мое просвещенным от Сына Твоего, да во свете Его узрит свет и направит стопы своя к Нему.

Воспитай чадо мое всегда обращающим очи сердца своего к Создателю всяческих;

воспитай чадо мое, путеводствующи его звездою утреннею, яже есть Сын Твой, во обители праведников.

Воспитай чадо мое кротким, молчаливым и трепещущим словес Божиих;

воспитай чадо мое любящим Тебе и Сына Твоего не токмо умом, но и сердцем.

Воспитай, Владычице, чадо мое (*имя*) достойным Небесного Царствия и наследником вечных благ его сотвори.

Кондак 7

Хотящи чаду моему вечнаго спасения, со слезами предстою пред честною Твоею иконою, Владычице, да не презреши моления моего, внемда звати ми Сыну Твоему: Аллилуия.

Икос 7

Новую покажи милость на чаде моем и дивными и неизследимыми судьбами Сына Твоего привлецы его под Свой благодатный покров, да со усердием зову Ти:

Воспитай чадо мое ищущим прежде Царствия Божия и правды Его;

воспитай чадо мое входящим тесными враты в живот вечный.

Воспитай чадо мое на всяком месте творящим волю Сына Твоего и Бога;

воспитай чадо мое не глаголющим, ниже мыслящим хулу на Духа Святаго;

Воспитай чадо мое вопиющим к Богу день и ночь;

воспитай чадо мое в малом числе избранных Твоих.

Воспитай, Владычице, чадо мое (*имя*) достойным Небесного Царствия и наследником вечных благ его сотвори.

Кондак 8

Странствующе в юдоли сей земной, многоскорбной и
многомятежной, чадо мое где обретет отраду и утешение,
аще не в Тебе, Пречистая! Путеводствуй же его и настави его
на путь истинный, да зовет Богу: Аллилуия.

Икос 8

Всем еси Мати милующая, Ты, Владычице, и хочу, да пребудеши Материю чаду моему. Се вручаю его в руке Твои и во смирении прошу Тя:

Воспитай чадо мое бодрствующим и молящимся, да не внидет во искушение;

воспитай чадо мое милосердным, якоже Отец наш Небесный милосерд есть.

Воспитай чадо мое в простоте младенческой, яко таковых есть Царство Божие;

воспитай чадо мое меньшим всех, да будет пред Богом велик.

Воспитай чадо мое соблюдающим слово Божие, причастником блаженства райскаго его содевающи;

воспитай чадо мое благонадежным для Царства Небесного.

Воспитай, Владычице, чадо мое (*имя*) достойным Небесного Царствия и наследником вечных благ его сотвори.

Кондак 9

Всякого добра душу и сердце чада моего исполни, Дево, подающая от щедрот Твоих всем по коегождо потребе, и отжени от него злосмраднаго духа безбожия, да зовет Богу: Аллилуия.

Икос 9

Ветий суемудренных вещания, не разумеющих Твоего всемогного заступления, да не внидут во уши чада моего, молю Тя, вопиючи:

Воспитай чадо мое в целомудрии и послушании;
воспитай чадо мое бегающим утех мира и прелестей века сего.

Воспитай чадо мое уклоняющимся от зла и творящим благо;

воспитай чадо мое творящим добрый плод.

Воспитай чадо мое любящим и молящимся о вразех своих;

воспитай чадо мое совершенным, яко совершен Отец наш Небесный.

Воспитай, Владычице, чадо мое (*имя*) достойным Небесного Царствия и наследником вечных благ его сотвори.

Кондак 10

Спасти хотя мир, Сын Твой прииде с небесе призвати не праведники, но грешники на покаяние. Сего ради моли Сына Твоего о чаде моем, да спасенный Тобою воззовет Богу: Аллилуия.

Икос 10

Стена несокрушимая буди, Небесная Царице, чадо моему, да Тобою ограждаем и наставляем, возможет содеяти множество благих дел, да и с ним зову Тебе сице:

Воспитай чадо мое ведущим творити волю Сына Твоего и Бога;

воспитай чадо мое ненавидящим грех и всякое беззаконие.

Воспитай чадо мое любящим добро и всякую добродетель;

воспитай чадо мое в чистоте непорочней.

Воспитай чадо мое восходящим по лестнице добродетелей на кийждо день;

воспитай чадо мое в горести своей обращающим очи к Твоему милосердию.

Воспитай, Владычице, чадо мое (имя) достойным Небесного Царствия и наследником вечных благ его сотвори.

Кондак 11

Пети Твое необоримое заступление выну сподоби чадомое, да Твоею благодатию отверзет устне свои воспевати Богу: Аллилуия.

Икос 11

Светоприемную свещу, пламенеющую и истаявающую от любви к Тебе и Сыну Твоему и ближнему день и ночь, живот чада моего соделай и не презри мене, зовущую Ти:

Воспитай чадо мое любящим Тя от всего сердца и помышления;

воспитай чадо мое всегда взирающим на крест и страдания Сына Твоего.

Воспитай чадо мое отверзающим устне своя токмо на похваление и прославление благодати Твоея;

воспитай чадо мое ждущим пришествия Сына Твоего со слезами.

Воспитай чадо мое в молитве трезвенной и непрестанней; воспитай чадо мое в благоговении всегда Тебе предстоящим.

Воспитай, Владычице, чадо мое (*имя*) достойным Небесного Царствия и наследником вечных благ его сотвори.

Кондак 12

Благодатию неизреченною Духа Святаго напитай сердце чада моего, еже возлюбити Сына Твоего и Бога, и Тебе, Преплагу, да Тобою подвигаем, зовет Царю всяческих: Аллилуия.

Икос 12

Поющи Твое милосердие, имже милуеши и питаеши чадо мое, молюся: не престай просити о нем Сына Твоего, вся бо Тебе возможна суть, и исполни во благо мольбы моя таковыя:

Воспитай чадо мое исполненным Духа Святаго;
воспитай чадо мое, да поставлен будет на Суде Сына Твоего одесную.

Воспитай чадо мое живущим свято;
воспитай чадо мое благодатию Духа Божия твердо на пути правом пребывающим.

Воспитай чадо мое в плаче о гресех житие свое проводящим;

Воспитай чадо мое алчущим и жаждущим Божия благодати.

Воспитай, Владычице, чадо мое (*имя*) достойным Небесного Царствия и наследником вечных благ его сотвори.

Кондак 13

О всепетая Мати Иисуса сладчайшаго! Приими сие малое акафистное моление, в воню благоухания духовного о чаде моем приносимое, и покрый его милосердным Твоим покровом. Даруй ему мыслити, ведати, слышати, глаголати и творити точию Тебе и Сыну Твоему угодная и спасению души его споспешная. И послѣ ему в жизни сей привременной вся потребная к вечному спасению, да зовет Богу: Аллилуия.

Этот кондак читается трижды, и снова 1й икос и 1й кондак:

Икос 1

Ангела с небесе послати чаду моему исходатайствуй, Пресвятая, у Сына Твоего и Бога, якоже и Тебе послан бысть хранитель прекрепкий, Гавриил Архангел, и сподоби мя взывати Тебе сице:

Воспитай чадо мое земным ангелом;

воспитай чадо мое небесным человеком.

Воспитай чадо мое Тебе угодным;

воспитай чадо мое сокрушенным духом и сердцем.

Воспитай чадо мое Твоим рабом;

воспитай чадо мое зовущим Тебе: «Радуйся, Благодатная, Господь с Тобою!»

Воспитай, Владычице, чадо мое (*имя*) достойным Небесного Царствия и наследником вечных благ его сотвори.

Кондак 1

Взбранной Воеводе и благой Воспитательнице рода христианскаго, яко избавльшися от злых, благодарственная восписую Ти, раба твоя, Богородице; но яко имущая державу непобедимую, от всяких бед чадое мое свободи, со слезами бо зову Ти:

Воспитай, Владычице, чадое мое (*имя*) достойным Небесного Царствия и наследником вечных благ его сотвори.

Молитва ко Господу

Господи Иисусе Христе, Сыне Божий, молитв ради Пречистыя Твоея Матере услыши мя, недостойную рабу Твою (*имя*).

Господи, в милостивой власти Твоей чада моя, рабы Твоя (*имена*). Помилуй и спаси их, имене Твоего ради. Господи, прости им вся согрешения, вольная и невольная, содеянная ими пред Тобою. Господи, настави их на истинный путь заповедей Твоих и разум их просвети светом Твоим, сердце согрей любовью Твоею. Господи, благослови их в доме, в школе, в пути и на всяком месте владычества Твоего. Господи, сохрани их под кровом Твоим от летящих пули, стрелы, ножа, меча, яда, огня, от смертоносных язвы и от внезапных смерти. Господи, огради их от всяких видимых и невидимых врагов, от всяких бед, зол и несчастий. Господи, исцели их от всяких болезней, очисти от всякия скверны и облегчи их душевные страдания и скорби. Господи, даруй им благодать Духа Твоего Святаго на многая лета жизни, здравие и целомудрие во всяком благочестии и любви. Господи, подаждь им остроту разума и укрепи телесные силы. Господи, дай им Твое благословение на благочестивую семейную жизнь и благочестивое деторождение. Господи, даруй мне, недостойной и грешной рабе Твоей (*имя*) благословение на воспитание чад моих, имене Твоего ради, ибо Царствие Твое

вечно, всеильно и всемогущественно. Аминь.

Молитва к Божией Матери

О Пресвятая Владычице Дево Богородице, спаси и сохрани под кровом Твоим моих чад (*имена*), всех отроков, отроковиц и младенцев, крещеных и еще безымянных, и во чреве матере носимых. Укрой их ризою Твоею Матернею, соблюди их в страхе Божии и послушании родителем, умоли Господа моего и Сына Твоего, да дарует им полезная ко спасению их. Вручаю их Матернему смотрению Твоему, яко Ты еси божественный покров рабom Твоим. Аминь.

Текст акафиста приводится по следующему изданию: Акафисты Божией Матери / Изд. испр. и дополненное. – М.: Ковчег, 2008. – С. 134–153. – По благословению Высокопреосвященного Сергия, архиепископа Тернопольского и Кременецкого. Акафист на момент издания не имеет общецерковного утверждения.



Икона Пресвятой Богородицы «Прибавление ума»

Акафист Пресвятой Богородице в честь иконы Ее, именуемой «Прибавление ума»¹

Кондак 1

Избранней от всех родов Божией Матери, Небесе и земли Царице, врачевство духовное всему миру подающей, благодарственная пения приносим о даровании Божественного сокровища, чудотворныя иконы Ея, «Прибавление ума» нареченныя, еюже ограждаеми, радуемся светло и с любовью взываем:

Радуйся, Всемиловитая Владычице, премудрость и разум верным людям Твоим дарующая.

¹ Автор акафиста – А. А. Трофимов

Икос 1

Ангел предстатель послан бысть во град Назарет к чистей Отроковице Марии рещи: «Радуйся!». Пречистая же Дева, благовестие Архангела слышавши, во смирении сердца отвеща: «Се, Раба Господня, буди Мне по глаголу твоему». Тогда Бог Слово воплощашеся во утробе Ея. Мы же грешнии, благоговейно чтуще Матерь Христа Бога нашего, яко ангелом научихомся, тако со умилением вопием Благодатней:

Радуйся, Благословенная в женах;

радуйся, у Господа обретшая благодать.

Радуйся, силою Всевышняго осененная;

радуйся, Духом Святым освященная.

Радуйся, верная Рабо Господня;

радуйся, Богоизбранная Отроковице.

Радуйся, Спасителя мира рождшая;

радуйся, Мати Света, всех просвещающего.

Радуйся, премудрых превосходящая разум;

радуйся, верных озаряющая смыслы.

Радуйся, Небесе и земли Царице;

радуйся, яко Тя ублажают вси роди.

Радуйся, Всемиловитая Владычице, премудрость и разум верным людям Твоим дарующая.

Кондак 2

Видящи, Всенепорочная, желание людей новопросвещенных, благослови евангельских таин благовестника апостола Луку написать пречистаго лика Твоего изображение, и на него зрящи, глаголала еси: «С сим образом благодать Моя и сила да будет». Темже благоговейно покланяющеся пред святыми иконами Твоими, имиже весь мир христианский украсила еси, благодарственно вопием о Тебе Богу: Аллилуия.

Икос 2

Разум небесный открывающи, Пречистая Дево, благоизволила еси явити всем верным, яко в мире есть воля Божия, благая и совершенная, и всяк ум превосходящая. Призри на нас, Всепетая Богородице, озари светом истины, утеши нас, яко Мати, настави нас на путь правды, да возопиим моляще Тебе тако:

Радуйся, Божию Силу и Божию Премудрость, Христа, породившая;

радуйся, Бога с человеки соединившая.

Радуйся, светом разума души наша просвещающая;

радуйся, неизреченныя славы Божия вместилище.

Радуйся, почитания святых икон освящение;

радуйся, духовных сокровищ Подательнице.

Радуйся, честным Твоим иконам благодать даровавшая;

радуйся, яко на иконы Твоя взирающе, Самой Тебе покланяемся.

Радуйся, во всем мире исцеления от святых икон Твоих подающая;

радуйся, к Небесем умы и сердца наша возводящая.

Радуйся, всю вселенную лучами Твоея благодати озарившая;

радуйся, с Сыном Твоим и Богом вечно царствующая.

Радуйся, Всемиловитая Владычице, премудрость и ра-

зум верным людям Твоим дарующая.

Кондак 3

Силою благодатною осеняеми, благочестивии людие во град Назарет приидоша и обретоша тамо дом Богородичен, идеже Пречистая Дева родися и благовестие Архангела приют, и пренесоша дом той в землю Италийскую, во град Лорето. Верху же дома онаго доныне есть икона Богородична, от древа сотворена, юже ангельския Небесныя Силы невидимо окружают и благолепно чествуют, радостно вопиюще Богу: Аллилуия.

Икос 3

Имуще к роду христианскому матернее милосердие, вся концы земли ко спасению призываеши, Пречистая, темже убо народи разноязычнии от многих стран приходят в дом Твой и пред иконою Твоею исповедуют грехи своя. Того ради от востока до запада прославлена бысть икона Твоя, и избавлении от болезней, скорбей и напастей людие приносят Ти благодарения, взывающе:

Радуйся, Доме, Егоже созда Себе Премудрость Божия;
радуйся, граде Божий, иже от малаго града Назарета произыде.

Радуйся, дом Божий явлением Своим озарившая;
радуйся, Отроковице, Святая Святых большая.

Радуйся, с Предвечным Богомладенцем в Назарет пришедшая;

радуйся, таинству спасения рода человеческого послужившая.

Радуйся, Лестнице, еуже восходим от земли на Небо;
радуйся, всему миру предивный Покрове.

Радуйся, яко с верою покланяемся пречистаго лика Твоего изображению;

радуйся, яко от него приемлем благодатныя дары во спасение душ наших.

Радуйся, дивная знамения иконами Твоими совершаю-

щая;

радуйся, державная Заступнице рода христианского.

Радуйся, Всемилостивая Владычице, премудрость и разум верным людям Твоим дарующая.

Кондак 4

Бурею скорби велия одержим бе изограф некий, в помрачении разума от земных врачей никоеяже пользы получивый. Тогда Пречистая Мати Господа явися болящему и заповеда икону написать, яже дом Ея во граде Лорето освящает. Сия исполнив, изограф исцелися и от того дне икону новописанную «Прибавление ума» нарече, поя пред нею хвалебную песнь Богу: Аллилуия.

Икос 4

Слышавше людие земли Русския, яко благоизволи Пресвятая Богородица дати им в радость и утешение икону Свою, «Прибавление ума» нареченную, украсиша храмы и дома своя многими списками ея, от нихже дивная знамения и чудеса обильно содеваются всем притекающим с верою и поющим Препоблагословенней таковая:

Радуйся, образ Твой честный во утешение и освящение нам даровавшая;

радуйся, болезни душевные и телесныя иконою Твоею скоро врачующая.

Радуйся, землю Русскую покровом милости Твоя осенившая;

радуйся, любящая и чтущия Твой образ от всяких бед избавляющая.

Радуйся, со иконами Твоими благодатными невидимо в дома наша входящая;

радуйся, благословение и радование тем приносящая.

Радуйся, оставленных врачами на Свое всемогущей руке приемлющая;

радуйся, иждившим от недуга ум исцеление подающая.

Радуйся, безнадежных надеждо;

радуйся, умов наших просвещение.

Радуйся, познания истины чистое зеркало;

радуйся, яко от востока и до запада имя Твое ублажается.

Радуйся, Всемилостивая Владычице, премудрость и разум верным людям Твоим дарующая.

Кондак 5

Боготечней звезде подобна явися икона Твоя, Богомати: страну бо нашу Российскую и грады ея освящает, сущих во тьме невежества светом боговедения озаряет, разум наш, страстями помраченный, просвещает, заблуждающихся же наставляет на путь делания заповедей Сына Твоего и Бога, Ему же благодарственне вопием: Аллилуия.

Икос 5

Видевше Божественное сокровище – дивную икону Богоматере, к сей усердно притекающе, в недужех исцеление, в скорбех утешение, в бедах избавление приемлем и радостно поем Заступнице нашей:

Радуйся, явлением иконы Твоея верных осиявшая;
радуйся, яко Тобою во тьме возсия Солнце Правды, Христос Бог наш.

Радуйся, Мати Света умнаго, благодатию всю вселенную озарившаго;

радуйся, зарями благодати нас просвещающая.

Радуйся, светом Твоим мрак неведения нашего разгоняющая;

радуйся, Дево, яко Тобою свет боговедения всем возсия.

Радуйся, свеще неугасимая, свет веры воспламеняющая;

радуйся, добродетели путь освещающая.

Радуйся, святыни источнице;

радуйся, от бед и напастей крепкая наша Хранительнице.

Радуйся, любви Божественныя светильнице неугасимый;

радуйся, сиянием чудес Твоих весну спасения нам возвещающая.

Радуйся, Всемиловитая Владычице, премудрость и разум верным людям Твоим дарующая.

Кондак 6

Проповедует мир весь милости Твоя, Мати Господа нашего, во градах бо и весех земли Русския икона Твоя «Прибавление ума» лучами чудес сияет, просвещаючи души наша светом Божия благодати и подвизаючи пети прославльшему Тя Богу: Аллилуия.

Икос 6

Возсия в честней иконе Твоей, Богородице, свет спасения всем, блуждающим во тьме грехов и страстей, и всем молящимся пред нею с верою и благоговением скорая помощь подается. Умов наших омрачение светом Твоим отжени, Всепетая, и даруй истинный Свет узрети всем, с любовью вопиющим Ти сице:

Радуйся, звездо незаходимая, Солнце Правды в мир вводящая;

радуйся, Мати Света истинного, души верных просвещающего.

Радуйся, благодатного учения Наставнице;

радуйся, яко светлым покровом ум наш омраченный осеняеши.

Радуйся, заре не вечерняя, мглу наших грехов разгоняющая;

радуйся, тьмы и вечных мук нас избавляющая.

Радуйся, от сетей вражиих свободящая;

радуйся, безумие мира побеждающая.

Радуйся, душевредных учений низложение;

радуйся, душеполезных знаний дарование.

Радуйся, иконою Твоею нас утешающая;

радуйся, светом радости души ободряющая.

Радуйся, Всемиловитая Владычице, премудрость и ра-

зум верным людям Твоим дарующая.

Кондак 7

Хотяй всем человеком спастися и в разум истины приити, премилосердый Господь и Создатель наш Пречистыя Матере Своея образ «Прибавление ума» даровал есть нам, да вси с верою молящися пред ним, крепость слова, и разум, и мудрость приимше, в тишине помыслов Царю и Богу нашему поют: Аллилуия.

Икос 7

Новая и преславная чудеса являеши, Мати Божия, верным людем святою иконою Твоею: силою благодати Христо-вы помраченныя умом просвещаеши, от безумия отвращаеши, расслабленныя укрепляеши и всем притекающим к целебному Твоему образу скорую помощь подаеши, подвизающи пети Тебе таковая:

Радуйся, из глубины неведения извлекающая;

радуйся, многи в разуме просвещающая.

Радуйся, слово премудрости просящим дарующая;

радуйся, несмысленных разумны содевающая.

Радуйся, греховныя помыслы отгоняющая;

радуйся, сердца ожесточенная умягчающая.

Радуйся, ум к Богу возвышающая;

радуйся, немудрыя умудряющая.

Радуйся, ко благочестию наша Наставнице;

радуйся, одаряющая нас вечною радостью.

Радуйся, к Сыну Твоему и Богу молитвы верных приносящая;

радуйся, и Сама непрестанно у Престола Вседержителя о всех молящаяся.

Радуйся, Всемиловитая Владычице, премудрость и разум верным людем Твоим дарующая.

Кондак 8

Странно есть видети икону Твою, Пречистая Богородице Дево, на досце написанную, духов тьмы прогоняющую силою Твоею Божественною и разум подающую немощию ума одержимым и всем неудобь учащимся; и нас, во гресех погибающих, молим Тя со слезами, избави от враг видимых и невидимых, от тьмы неразумия, да всегда поем Спасителю и Богу нашему: Аллилуия.

Икос 8

Вся земля Русская преисполнена, яко звездами богосветлыми, чудотворными иконами Твоими, Богородице Дево, в нейже и сия икона Твоя, «Прибавление ума», благодатию сияет и согревает оледеневшая сердца наша знаменьями милости Твоея к нам грешным. Сего ради пред ликом Твоим святым преклоньше колена, воспеваем Тя, Всепречистая Мати наша, тако:

Радуйся, скорби наша в радость претворяющая;
радуйся, от разжженных стрел лукаваго нас защищающая.
Радуйся, младенцев воспитание и благодатное хранение;
радуйся, юности Охранительнице и Наставнице премудрая.

Радуйся, детям неудобь учащимся разум подающая;
радуйся, вражия сети разрушающая.
Радуйся, верных разум просвещающая;
радуйся, неверных посрамляющая.
Радуйся, помрачением ума одержимых исцеляющая;
радуйся, яко благодатию от иконы Твоея демоны прогоняются.

Радуйся, Мати милосердия и щедрот;
радуйся, Надеждо вечнаго нашего спасения.
Радуйся, Всемиловитая Владычице, премудрость и разум верным людям Твоим дарующая.

Кондак 9

Всякое естество ангельское благоговейно Тебе служит, Небеси и земли Царице, человеческий же род хвалы Тебе приносит и Твою святую икону почитает, сию бо во отраду и утешение даровала еси нам. Научи нас, о Всеблагая, достойно славить Тя и воспевати рождшемуся от Тебе Спасителю мира: Аллилуия.

Икос 9

Ветии человечестии недоумевают познати тайну служения Твоего роду христианскому, Богородице, ниже могут изъяснити силу чудотворную, от икон Твоих происходящую на всяку пользу душевную и телесную человеком. Мы же, православнии, со слезами радости пред иконою Твоею святою предстояще, прославляем Тя, Благодатная, и глаголем:

Радуйся, ангелов радование;

радуйся, от Архангел покланяемая.

Радуйся, юже на воздухе сретают Херувими;

радуйся, ейже похвальная приносят Серафими.

Радуйся, светлое Церкви Небесных и земных украшение;

радуйся, всех Небесных Сил вышшая.

Радуйся, от воинств Небесных почитаемая;

радуйся, всех земнородных славо.

Радуйся, образом Твоим умы наша к Горнему возводящая;

радуйся, Путеводительнице наша к Небесному Отечеству.

Радуйся, сиянием души Твоея всю землю просвещающая;

радуйся, всех нас при Кресте Сына Твоего усыновившая.

Радуйся, Всемиловитая Владычице, премудрость и разум верным людям Твоим дарующая.

Кондак 10

Спасти хотя мир от безумия и прелести вражия, Человеколюбец Господь чудную икону Твою, Богомати, дарова, пред неюже помраченнии умом исцеляются, беснующиися от демонов свободяются, скорбящии утешение и радость обретают. Темже прославляюще Бога, подающего нам таковыя милости, вопием Ему благодарне: Аллилуия.

Икос 10

Стена неборимая и Покров буди нам, Всенепорочная, сопротив ополчений видимых и невидимых враг, ограждаючи нас от всяких бед и болезней. Сего ради припадающе к иконе Твоей «Прибавление ума», с верою в помощь благодатную и врачевство всем недугом душевным и телесным, радостно вопием Ти сице:

Радуйся, от путей погибельных нас удаляющая;
радуйся, на всяку истину верных наставляющая.
Радуйся, духа болезни и уныния отгнание;
радуйся, духа разума и крепости стяжание.
Радуйся, врагов силою Божиею посрамляющая;
радуйся, советы нечестивых разоряющая.
Радуйся, беснующимся здравие подающая;
радуйся, вся лютыя недуги врачующая.
Радуйся, от смерти духовныя нас избавляющая;
радуйся, слезами Твоими грехи наша омывающая.
Радуйся, радостию духовною нас дивно насыщающая;
радуйся, и в будущем веце вечныя радости нас сподобляющая.

Радуйся, Всемиловитая Владычице, премудрость и разум верным людям Твоим дарующая.

Кондак 11

Пение благодарственное приносим пред пречистым образом Твоим, Пренепорочная, за неизреченное Твое милосердие и молимся, о Богоблагодатная: огради ум наш и сердце от тлетворных учений, неверия и суеверия, сохрани страну нашу Российскую от всяких нестроений, врагами веры во отечестве нашем воздвигаемых, и сподоби нас чистым сердцем славить Создателя нашего, поюще песнь: Аллилуия.

Икос 11

Яко светоприемную свещу зрим икону Твою, Богомати, сиянием чудес землю нашу просвещающую, на путь спасения нас наставляющую и сердца наша любовью воспламеняющую к Тебе, Пречистой Матери Господа. Мы же, ведуще силу благодати Твоея, песнями радостными прославляем Тя сице:

Радуйся, премудрости Соломоновы превышшая;
радуйся, сокровенная тайны Божия верным открывающая.

Радуйся, любомудрыя немудрыя являющая;
радуйся, молнии, души просвещающая.
Радуйся, суетную мудрость века сего посрамляющая;
радуйся, ослепленных ею на путь правый наставляющая.
Радуйся, искренне молящимся ум обновляющая;
радуйся, в час недоумений мысль благу на сердце полагаящая.

Радуйся, Премудрости и благодати Божия откровение;
радуйся, Горняго мира Красото.
Радуйся, явившая нам дивную икону Твою, яко дар Небесный;
радуйся, источниче радости непрестанныя.
Радуйся, Всемиловитая Владычице, премудрость и разум верным людям Твоим дарующая.

Кондак 12

Благодать Божественную испроси у Сына Твоего и Бога, о Всеблагая, подай нам руку помощи, да не погибнем без покаяния; согрей нас любовью Твоею, очисти умы наша от греховных помыслов, просвети сердечныя очи наша к зрению спасения и сподоби нас в жизни сей и в Царстве Небесном воспевати Творцу и Создателю нашему: Аллилуия.

Икос 12

Поюще чудеса, от иконы Твоея явленная, Владычице, хвалим, славим и величаем Тя, честнейшую воистину Херувим и славнейшую без сравнения Серафим. Призри с Небесе, Богородице, на предстоящая пред святою иконою Твоею и благодать Твою ниспосли нам, избави от всяких бед и искушений вражиих всех воспевающих Тя, яко Заступницу и Хранительницу нашу:

Радуйся, молитвами Твоими весь мир спасающая;
радуйся, нынешняго скорбнаго века утешение.

Радуйся, Мати Света, светом чистоты Твоея всех просвещающая;

радуйся, воли Господни тайны нам открывающая.

Радуйся, страну Российскую в достояние Себе избравшая;

радуйся, явлением чудотворных икон Твоих землю Русскую благословившая.

Радуйся, чудеса от образа Твоего к Свету истины нас возводящая;

радуйся, незримо нас благодатию осеняющая в образе Твоем.

Радуйся, радость благодатную в сердца боголюбивая изливающая;

радуйся, двери милосердия Божия ходатайством Твоим отверзающая.

Радуйся, дары Духа Святаго стяжати нам помогающая;
радуйся, едина Чистая и Благословенная в женах.

Радуйся, Всемиловитая Владычице, премудрость и разум верным людям Твоим дарующая.

Кондак 13

О Всепетая Мати Присносущнаго Света и отчия Премудрости, Ты еси свет омраченных, прибавление ума и радость сердец наших; услыши и приими моление нас грешных, умудри нас неразумных и настави на пение и молитву пред иконою Твоею, «Прибавление ума» нареченною. Не престай молити о нас, недостойных рабех Твоих, славящих Тя и поющих Сыну Твоему и Богу: Аллилуия.

Этот кондак читается трижды, и снова 1й икос и 1й кондак:

Икос 1

Ангел предстатель послан бысть во град Назарет к чистей Отроковице Марии рещи: «Радуйся!». Пречистая же Дева, благовестие Архангела слышавши, во смирении сердца отвеща: «Се, Раба Господня, буди Мне по глаголу твоему». Тогда Бог Слово воплощается во утробе Ея. Мы же грешнии, благоговейно чтуще Матерь Христа Бога нашего, яко ангелом научихомся, тако со умилением вопием Благодатней:

Радуйся, Благословенная в женах;

радуйся, у Господа обретшая благодать.

Радуйся, силою Всевышняго осененная;

радуйся, Духом Святым освященная.

Радуйся, верная Рабо Господня;

радуйся, Богоизбранная Отроковице.

Радуйся, Спасителя мира рождшая;

радуйся, Мати Света, всех просвещающего.

Радуйся, премудрых превосходящая разум;

радуйся, верных озаряющая смыслы.

Радуйся, Небесе и земли Царице;

радуйся, яко Тя ублажают вси роди.

Радуйся, Всемиловитая Владычице, премудрость и разум верным людям Твоим дарующая.

Кондак 1

Избранней от всех родов Божией Матери, Небесе и земли Царице, врачевство духовное всему миру подающей, благодарственная пения приносим о даровании Божественного сокровища, чудотворныя иконы Ея, «Прибавление ума» нареченныя, еюже ограждаемы, радуемся светло и с любовью взываем:


Радуйся, Всемиловитая Владычице, премудрость и разум верным людям Твоим дарующая.

Молитва

Богородице Пречистая, Доме, Егоже созда Себе Премудрость Божия, даров духовных Подательнице, от мира к премирным ум наш возводящая и всех к познанию разума приводящая! Приими молебное пение от нас, недостойных рабов Твоих, с верою и умилением покланяющихся пред пречистым образом Твоим. Умоли Сына Твоего и Бога нашего, да дарует властем нашим мудрость и силу, судиям правду и нелицеприятие, пастырем мудрость духовную, ревность и бдение о душах наших, наставником смиренномудрие, чадам послушание, всем же нам дух разума и благочестия, дух смирения и кротости, дух чистоты и правды. И ныне, Всепетая наша Мати, подай нам ума прибавление, умири, соедини во вражде и разделении сущия и положи им союз любви неразрушимый, всех заблуждших от неразумия к свету истины Христовы обрати, страху Божию, воздержанию и трудолюбию настави, слово премудрости и душеполезное знание просящим даруй, осени нас вечною радостью, Херувимов честнейши и Серафимов славнейши сущая. Мы же, дивная дела и многоразумную премудрость Божию в мире и жизни нашей видяще, устранимся земная суеты и излишних житейских попечений, и ум, сердце наше на Небеса возведем, яко да Твоим заступлением и помощью славу, хвалу, благодарение и поклонение за вся в Троице славимому Богу и

всех Создателю возсылаем, ныне и присно и во веки веков.
Аминь.

Текст акафиста приводится по следующему изданию: «Воскликните Богу гласом радования». Акафисты / Сост. Александр Трофимов. – М.: Паломник, 2007. – С. 63–75. – По благословению Высокопреосвященнейшего Прокла, архиепископа Симбирского и Мелекесского. *Акафист на момент издания не имеет общецерковного утверждения.*



президентский совет. Президентский указ

Gerardo T. de la Cruz, M.D.

Акафист преподобному Сергию, игумену Радонежскому

Кондак 1

Возбранный от Царя сил, Господа Иисуса, данный России воеводо и чудотворче предивный, преподобне отче Сергие! Прославляюще мы прославльшаго тя славы Господа, благодарственное пение воспеваем ти, ибо молитвами твоими от нашествия иноплеменник и скорбных обстояний нас присно избавляеши, яко имея дерзновение ко Господу, от всяких нас бед свободи, да зовем ти:

Радуйся, Сергие, скорый помощниче и преславный чудотворче.

Икос 1

Ангелов Творец, предуведевый, по самовластному чистаго сердца твоего изволению, всеусердствующее Его воли исполнение, еще во чреве матерни трикратным возглашением, показа ты миру истинного служителя быти Святыя Троицы и научи всех вопити тебе сице:

Радуйся, прежде век, яко имаши верный раб Христов быти, предусмотренный;

радуйся, во оно же время во блаженное и небесное жилище предоставленный.

Радуйся, от чрева матерня на службу Небеснаго Царя, яко воин, хотящий верен Ему быти, призванный;

радуйся, яко благодатию Божиею оправданный.

Радуйся, не точию в России, но и во всей вселенной прославленный;

радуйся, трикратным твоим во чреве возглашением родителей и всех слышащих удививый.

Радуйся, по рождении своем постное иноческое житие показавый;

радуйся, от сосца матерня воздержание чудное явивый.

Радуйся, яко в среду и пяток млека никакоже вкусивый;

радуйся, родителей благих добрый и избранный плоде.

Радуйся, радости скорбящим и милости с верою у тебе просящим подателю;

радуйся, печалей злых во всяких приключениях отгонителю.

Радуйся, Сергие, скорый помощниче и преславный чудотворче.

Кондак 2

Видящи вся Россия и иныя страны данною тебе, преподобне отче Сергие, благодатию Божиею, с верою к святым твоим мощем приходящим, и скорое вспоможение, и присное преславное чудес творение, удивляются. И мы вси, веселящися, яко имеем такового милостиваго помощника, Прославльшаго тя прославляюще и тя, благаго раба и вернаго слугу Господня, восхваляюще, вопием Ему: Аллилуия.

Икос 2

Разум, еще сущу ти во чреве матерни, Святую Троицу прославить Иисус Христос даровавый, и веру крепкую, надежду несумненную, любовь истинную к Не му имети утвердивый, сподоби тя во имя Святыя Троицы преславный храм и обитель чудную устроить, и во ону множество иноков собрать. Сего ради вернии научишася воспевати тебе тако:

Радуйся, честное Пресвятыя Троицы носило и похваление;

радуйся, добре стадо, тобою собранное, во спасениеставляяй.

Радуйся, честный образе агнцем и пастырем;

радуйся, правило веры и образе кротости духовныя.

Радуйся, святыням чистое и непорочное жилище;

радуйся, еще при жизни сподобивыйся видети Пресвятую Богородицу со двема апостолома.

Радуйся, удостоивыйся во время совершения литургии сослужения ангельскаго;

радуйся, во святую литургию в благодати Божией весь, аки во огни, стоящий.

Радуйся, оным Божественным огнем, в потир вшедым, причастивыйся;

радуйся, достоин бывый ангельскаго собеседования.

Радуйся, преисполненный всякия благостыни;

радуйся, чистоты душевныя и телесныя усердный хранителю.

Радуйся, Сергие, скорый помощниче и преславный чудотворче.

Кондак 3

Силою, данною ти свыше, будущая, яко настоящая, созерцающая, возвещал еси, и великому князю Димитрию о победе многочисленных прегордых агарян, хотящих Россию огнем и мечем опустошители, прорекл еси, и от своего иноческаго лика двух монахов на противных в помощь дал еси, и молитвою твоею святою к Богу вопия, на агаряны победу сотворил еси. За еже тя прославляюще и о таковой же твоей на противных православному воинству помощи просяще, Богу вопием: Аллилуия.

Икос 3

Имуще помышление родители твои и людие о трикратном твоём во чреве матернем в церкви глашении и удивльшися, разумеша нечто преславное и чудное быти: и по сих уведевше твое радостное рождение, радовахуся и радостная тебе приношаху, глаголюще:

Радуйся, отроча добродушевное и благонадежное;
радуйся, детище, всякия благодати Божия исполненное.

Радуйся, пречудное в младенчестве постничество нам являяй;

радуйся, оным многих приводяй во удивление и увеселяяй.

Радуйся, яко с тобою всегда бе благодать Господня;
радуйся, от юности твоя всем сердцем и мыслию Бога возлюбивый.

Радуйся, кротость, смирение и бдение имевый;
радуйся, вся мира сего красная, яко скоро исчезающая, презревающий.

Радуйся, вся плотския похоти Бога ради умертвивый;
радуйся, многообразныя козни лукаваго силою Божиею победивый.

Радуйся, многия люди от греховнаго пути ко Господу обративый и спасый;

радуйся, яко тобою сладостей духовных исполняемся.

Радуйся, Сергие, скорый помощниче и преславный чудотворче.

Кондак 4

Бури жития мира сего, присно внутренними и внешними злострадании волнующагося, преподобне отче Сергие, избавився, пришел еси во пристанище немятежное небесное, на места злачна и прохладна, идеже потоцы сладости неисповедимыя, пища славы Божия нетленная, пения и гласы празднующих. Тамо почиваеши и веселишися, со всеми ангельскими силами поя Богу: Аллилуия.

Икос 4

Слышаша, преподобне отче Сергие, ближнии и дальнии ангелоподобное твое житие и благодати чудес струю выну текущую, яко молитвою твоею прокаженнии очищаются, слепии прозирают, хромии ходят и разнообразных недугов с верою притекающие здравие улучают, сих избавльшися, вопияху к тебе таковая:

Радуйся, мироварнице, на вся недуги врачевание подавающая;

радуйся, безмездно паче естества врачу скоромилостивый.

Радуйся, милости превеликия и скорбным сострадания сокровище;

радуйся, всеусерднаго о людех промысления приятельще.

Радуйся, душу свою за человеки положить готовый;

радуйся, увеселение и отрада к тебе прибегающим.

Радуйся, мертвеца преславно молитвою твоею ожививый;

радуйся, оскудение монастырское в пищи исполнивый.

Радуйся, в сусе месте поток водный тещи у Бога испросивый;

радуйся, яко таяжде вода, молитвою твоею исцеляющи недуги, чудодействует.

Радуйся, чудес пучино, Богом излианная;

радуйся, желаемых благ пришедшим к тебе подателю.

Радуйся, Сергие, скорый помощниче и преславный чудотворче.

Кондак 5

Боготечная пресветлая звезда явился еси, преподобне отче Сергие, небо церковное украшая и всех блудящих по морю страстного жития сего данною тебе от Солнца Правды Христа Иисуса, истинного Бога, благодатию озаряя, мрак печалей и мглу всяких недугов и скорбей прогоняя, наставляя всех к тебе с верою притекающих на путь спасенный, к вечному Небесному Отечеству ведущий, поющих Богу: Аллилуия.

Икос 5

Видев преподобный Сергей, яко в мире сем всяческая сущета и тлению причастна, потщася вседушно Превечному Богу благоугодити, и воистину не вотще потрудися: премени бо тленная на нетленная, наипаче же предстояния сподобися у страшнаго Престола Владычня в славе вечней. Темже вопи-ем ему:

Радуйся, яко идеже Христос в телеси, таможде и ты пре-бываеши;

радуйся, тамо, яко в зеркале, в Бозе вся Ему любезная созерцаеши.

Радуйся, яко созерцая в Нем молящихся ти о помощи, молитвою твоею им полезная ходатайствуеши;

радуйся, скорый помощниче призывающим тя во бранех православным.

Радуйся, молитвою твоею Российстей стране победы на противныя подавая;

радуйся, скорбящим скоропредстательный утешителю.

Радуйся, немощей телесных и душевных немздоприем-ный исцелителю;

радуйся, многая чудеса благодатию Духа Святаго содева-яй.

Радуйся, хромым хождение и слепым прозрение подава-яй;

радуйся, грозд винный, питающий нас и веселящий.

Радуйся, розго Христа лозы истинныя, мног плод в пособие православным творящая;

радуйся, благий рабе и верный, и добрый делателю винограда Христова.

Радуйся, Сергие, скорый помощниче и преславный чудотворче.

Кондак 6

Проповедует держава Российская, богомудре Сергие, труды твоя и болезни, бдение же и сухоядение, ради душевнаго твоего спасения подъятыя, егоже ради прослави тя Господь славою Своею Божественною. Темже, яко рай насажденный, в Церкви явился еси, имущи древо жизни Самаго Господа, от Негоже вкусившии вся скоро гибнущая в мире сем презирают и радостно в прекрасный виноград вышний входят, идеже ты, предстоя Ему, вопиеши: Аллилуия.

Икос 6

Возсия Церкви и стране нашей Российстей просвещение совершенных твоих добродетелей, преподобне отче Сергие, о нихже благодаряще Отца Небеснаго, давшего тебе толикую благодать величия Своего, к тебе, яко к теплomu о нас молитвеннику, радостная воспеваем тако: Радуйся, ангельское житие нам являяй; радуйся, страсти греховныя уставляяй.

Радуйся, образе истиннаго смирения;
радуйся, зеркало совершеннаго терпения.

Радуйся, наставниче великий спасению;
радуйся, приводяй грешных ко исправлению.

Радуйся, известный исполнителю заповедей Христовых;
радуйся, душ немощных исцеление.

Радуйся, милостыню творити научаяй;
радуйся, ризы и брашна немощным подавати повелеваяй.

Радуйся, пустынноч, мирскую честь и богатство возненавидевый;

радуйся, постниче, от юности Богу послуживый.

Радуйся, Сергие, скорый помощниче и преславный чудотворче.

Кондак 7

Хотя избран дом Духу Святому себе сотворити, потщался еси тесным и прискорбным путем, ведущим в жизнь вечную, взем на рамо свое Крест Христов, шествовати, еже благодатию Божиею от юности твоея непорочно в творениях заповедей Господних совершив, достигл еси уготованнаго тебе в небесном всевеселом пребывании воздаяния, и тамо благодарственно поеши Богу: Аллилуия.

Икос 7

Новую благодать показа всех Творец и Владыка тебе, богумудре Сергие: аще бо и умерл еси на земли плотию, но душею в вышнем селении всегда жив сый, многая и преславная чудеса в мире живущим людям действуеши, и теплым твоим ходатайством пособствуеши, вопиющим к тебе таковая:

Радуйся, девственниче душею и телом;
радуйся, иноком наставниче предивный.

Радуйся, душ наших радование;
радуйся, быстрое нищим услышание.

Радуйся, скорбящим приятное попечение;
радуйся, чистоты усердный хранителю.

Радуйся, ненадежным надеяние;
радуйся, всея России увеселение.

Радуйся, древо чудоточное рая Иисусова;
радуйся, крине райскаго прозябения.

Радуйся, миро Христова благоухания;
радуйся, яко тобою приносится радование.

Радуйся, Сергие, скорый помощниче и преславный чудотворче.

Кондак 8

Странное и преславное чудо является притекающим к тебе, богомудре Сергие: ибо данною тебе Божиею благодатию с верою просящим немедленно от всяких многообразных телесных и душевных скорбей исцеляеши, от бед избавляеши, от напастей охраняеши, и всем всяко благополезное прошение исполняеши, и вопиеши Богу: Аллилуия.

Икос 8

Весь еси, преподобне отче Сергие, в вышних, но и нижних не оставляеши: присно со Христом Царем Вечным царствуеши и нас, грешных и недостойных, пред Ним воспоминаеши, моляся о спасении нашем. Темже от усердия нашего вопием к тебе сице:

Радуйся, оставльший имение и возлюбивый нищету Христову;

радуйся, достигший к неистощимому богатству.

Радуйся, Духу Святому подклонивыйся со всяким смирением;

радуйся, воине Христов непобедимый явльшийся.

Радуйся, крилома богомыслия сети вражия сокрушивый;
радуйся, смирением возвышаемый, в вечныя кровы возлетевый.

Радуйся, просвещенный внутрь благодатию;

радуйся, истребивый страстей мглу душевредную.

Радуйся, в подвизех дневных и ночных течение совершивый;

радуйся, в невечернем дни Царствия Божия присно почивай.

Радуйся, тамо снедения пищи разумныя сподобльшийся;

радуйся, яко того блаженства от Бога вечно удостоивыйся.

Радуйся, Сергие, скорый помощниче и преславный чудо-

творче.

Кондак 9

Всякое естество ангельское удивися великому свыше тебе дарованию, яко на земли невещественное житие показал еси, и во плоти, аки безплотен, явился еси. Сего ради многих чудес творения от Господа прием, чистою и боголюбезною душею твоею Того благостию к Небесным причтен еси силам, в Небесех ныне поеши всесильному Богу: Аллилуия.

Икос 9

Витии многовещаннии недоумеют достойно славить тя, достойный всякия славы, славне преподобне отче Сергие, ибо пачеестественная многая преславная чудодействия, еще жив сущ, показал еси, но и по смерти тая благодатию Божиею творити не престаеши. Мы же, любовию понуждаеми, дерзаем пети тебе сице:

Радуйся, земный ангеле и небесный человече;
радуйся, во плоти живой духовно, на земли небесно.

Радуйся, в человечестве пребываяй ангельски, в мире премирно;

радуйся, душевныма твоима очима выну Господа созерцавый.

Радуйся, пред лицом Божиим, яко раб пред Господом, ходивый;

радуйся, пред Оным, яко сын пред Отцем, яко ученик пред Учителем, шествовавый.

Радуйся, яко воин пред Воеводою готов сый вся повеленная Им творити;

радуйся, добрый стада своего иночествующих наставниче и правителю.

Радуйся, шествоваый от силы в силу, дондеже явился тебе Бог богов в Сионе;

радуйся, Единого Господа возлюбивый и к Нему очеса

своя выну имевый.

Радуйся, во вся дни живота своего Его искавый и в Нем намерение полагавый;

радуйся, ничесого на Небеси и на земли, разве Христа Иисуса, видети желавый.

Радуйся, Сергие, скорый помощниче и преславный чудотворче.

Кондак 10

Спасти хотя душу твою, в юности возраста своего отреклся еси воли своя и во знамение отсечения ея постригл еси власы главы своя, и был еси монах, покоривый себе воли Божией и начальником, от Не го поставленным, ихже веления тако слушал еси, яко Самаго Господа, никогда же прекословя, но слову веления исполнением дела отвечаая. Всяческая же приключения благодарно, яко верный раб, от Господа принимал еси, Емуже на Небесех предстоя, ныне вопиеши: Аллилуия.

Икос 10

Стена еси всем человеком, к заступлению твоему прибегающим, преподобне богомудре Сергие. Темже и нам, к тебе приходящим и милостиваго твоего во всяких нуждах заступления у Царя Небеснаго просящим, буди стена крепкая и ограждение непреоборимое, от всяких нас бед и напастей застения и ограждая, за еже мы вопием тебе таковая:

Радуйся, воине Царя Небеснаго, не обязавыйся куплями житейскими, да Ему угоден будеши;

радуйся, не восхотевый двема господинома, Богу и миру, работати, но Единому Богу точию.

Радуйся, от юности на тело свое, на мир сей и диавола вооруживыйся;

радуйся, постом, поклоны, стоянием на молитве, бдением умертвивый плоть свою.

Радуйся, умертвивый оную прежде, нежели она жива страstem баше;

радуйся, мертву содеявый гортань противу приимания сластей.

Радуйся, мертв сотворивый язык противу глаголения скверных, клеветных и ложных;

радуйся, мертвы устроивый ушеса противу слышания душевредных.

Радуйся, мертвы содеявый руце противу грабления и вся-

ких зол творения;

радуйся, мертво сотворивый чрево противу объядения и
пиянства.

Радуйся, мертва соделавый трудами чресла своя противу
нечистоты;

радуйся, мертвы сотворивый нозе противу течения в путь
грешников и на совет нечестивых.

Радуйся, Сергие, скорый помощниче и преславный чудо-
творче.

Кондак 11

Пение благодарственное благодетелю Христу Иисусу, ты, преподобне отче, прославляюще, вси православнии призывают, яко даровал ти многих чудес силу творения: слепыя просвещати, прокаженные очищати, больныя врачевати, бесныя от демонскаго дручения свободжати, толико сильне, якоже и не у приведенным к тебе бывшим бесным, еще на пути демоны от них отбегаху и ктому не возвращахуся, боящися в тебе силы Божия, юже выну в Небесех прославляя, вопиеши Богу: Аллилуия.

Икос 11

Светозарное светило в православной Российской державе и во всей вселенной благодатию немерцающего Солнца, Христа Иисуса, просвещающе возсиявшее, зрим тя, богомудре отче: с невещественными бо в вышних предстоя Престолу Троицы Пресвятыя, радости превеликия исполнен еси и Божественными лучами Трисолнечнаго Света осияваемъ, облистаеши верныя, вопиующия к тебе таковая:

Радуйся, возшедый на гору превысоку добродетелей Божественных;

радуйся, яко от тоя удобъ возшел еси на гору небесную.

Радуйся, яко от обители земныя во обитель небесную водворился еси;

радуйся, яко восходя тамо душею, нам мощи твоя святыя оставил еси.

Радуйся, яко мощи твоя исцелевают всякия скорби и болезни;

радуйся, яко мощей твоих демони трепещут.

Радуйся, яко твоя мощи комуждо в приключшихся печалех бывают увеселение;

радуйся, душею востекый в Сион Горний к Царю Небесному.

Радуйся, яко тамо предстоя, о всех к Нему тепле ходатайствуеши;

радуйся, яко благоутробие Его о всех чтущих память твою
умилостивляеши.

Радуйся, стране нашей на противных победу молитвою
твоею содеваеши;

радуйся, всем верным всякое прошение во их пользу исполняеши.

Радуйся, Сергие, скорый помощниче и преславный чудотворче.

Кондак 12

Благодать, данную ти от Бога, сведуще, тебе, приснаго нашего милостиваго отца, прилежно просим: пролей ныне теплую твою молитву о нас, грешных, ко Господу, яко да презрев вся наша согрешения, дарует победы на враги, яко царю Константину на Максентия, яко Давиду на Голиафа; державу Российскую да укрепит, Церковь Свою Святую от распрей и расколов непозыблему да сохранит, обилие всяких плодов земли да дарует и вся православныя христиане да спасет и помилует, чесого от Него твоими молитвами улучшить ожидающе, вопием Ему: Аллилуия.

Икос 12

Поюще дивнаго во святых Своих Царя Небеснаго, прославльшаго тя, вернаго Своего раба, преподобнаго отца Сергия, милостивое твое, скорое нам во всяких нуждах и печалех поможение прославляем, ибо в тебе в Троице прославляемый Бог наш преславным многим чудодействием дивно прославися, о чесом удивляющеся вопием к тебе сице:

Радуйся, великославный российский наш заступниче, отче Сергие;

радуйся, совершенный в добродетелех человеце.

Радуйся, дивный подражателю совершенства Отца нашего Небеснаго;

радуйся, преблагий и добрый наставниче иноков.

Радуйся, образе пустынножителей и устроителю общего жития;

радуйся, всех православных скорый помощниче и заступниче.

Радуйся, Царя Небеснаго и Бога известный умилоstitивителю;

радуйся, многжды заступлением твоим прошения предваряяй.

Радуйся, покрове, Богом зданный, имже покрываются мнози;

радуйся, ленивых подвигнувый твоими христоподража-

тельными нравами.

Радуйся, доброзрачное света евангельского всесветлое сияние;

радуйся, Трисолнечного Святыя Троицы света выну просвещающее озарение.

Радуйся, Сергие, скорый помощниче и преславный чудотворче.

Кондак 13

О чудотворче преславный и заступниче всем нам во всяких бедах и скорбех скорый и пречудный, богомудре отче Сергие! Нынешнее наше приими приношение и богоприятным твоим ходатайством умоли Господа сил силу свыше православному нашему воинству на сопротивныя подати, и нам всем, Того благодатию очистившимся, от геенны избавитися, и грядущая в Небесех благая улучшить, вопиющим Ему: Аллилуия.

Этот кондак читается трижды, и снова 1й икос и 1й кондак:

Икос 1

Ангелов Творец, предуведевый, по самовластному чистаго сердца твоего изволению, всеусердствующее Его воли исполнение, еще во чреве матерни трикратным возглашением, показа ты миру истинного служителя быти Святыя Троицы и научи всех вопити тебе сице:

Радуйся, прежде век, яко имаши верный раб Христов быти, предусмотренный;

радуйся, во оно же время во блаженное и небесное жилище предоставленный.

Радуйся, от чрева матерня на службу Небеснаго Царя, яко воин, хотящий верен Ему быти, призванный;

радуйся, яко благодатию Божиею оправданный.

Радуйся, не точию в России, но и во всей вселенной прославленный;

радуйся, трикратным твоим во чреве возглашением родителей и всех слышащих удививый.

Радуйся, по рождении своем постное иноческое житие показавый;

радуйся, от сосца матерня воздержание чудное явивый.

Радуйся, яко в среду и пяток млека никакоже вкусивый;

радуйся, родителей благих добрый и избранный плоде.

Радуйся, радости скорбящим и милости с верою у тебе просящим подателю;

радуйся, печалей злых во всяких приключениях отгонителю.

Радуйся, Сергие, скорый помощниче и преславный чудотворче.

Кондак 1

Возбранный от Царя сил, Господа Иисуса, данный России воеводу и чудотворче предивный, преподобне отче Сергие! Прославляюще мы прославльшаго тя славы Господа, благодарственное пение воспеваем ти, ибо молитвами твоими от нашествия иноплеменник и скорбных обстояний нас присно избавляеши, яко имея дерзновение ко Господу, от всяких нас бед свободи, да зовем ти:


Радуйся, Сергие, скорый помощниче и преславный чудотворче.

Молитва

О священная главо, преподобне и Богоносне отче наш Сергие, молитвою твоею, и верою, и любовью, яже к Богу, и чистотою сердца, еще на земли во обитель Пресвятыя Троицы душу твою устроивый, и ангельскаго общения и Пресвятыя Богородицы посещения сподобивыйся, и дар чудодейственныя благодати приемый, по отшествии же твоем от земных наипаче к Богу приближивыйся, и небесныя силы приобщивыйся, но и от нас духом любви своея не отступивый, и честныя твоя мощи, яко сосуд благодати полный и преизливающийся, нам оставивый! Велие имея дерзновение ко Всемилостивому Владыце, моли спасти рабы Его, сущей в тебе благодати Его верующия и к тебе с любовью притекающия. Испроси нам от Великодаровитаго Бога нашего всякий дар, всем и коемуждо благопотребен, веры непорочны соблюдение, градов наших утверждение, мира умирение, от глада и пагубы избавление, от нашествия иноплемennых сохранение, скорбящим утешение, недугующим исцеление, падшим возставление, заблуждающим на путь истины и спасения возвращение, подвизающимся укрепление, благоделающим в делах благих преуспеяние и благословение, младенцем воспитание, юным наставление, неведущим вразумление, сиротам и вдовицам заступление, отходящим от сего временнаго жития к вечному благое уготовление и напут-

ствие, отшедшим блаженное упокоение, и вся ны споспешествующими твоими молитвами сподоби в день Страшного суда шуия части избавитися, десныя же страны общники быти и блаженный оный глас Владыки Христа услышати: приидите, благословеннии Отца Моего, наследуйте уготованное вам царствие от сложения мира. Аминь.

Текст акафиста приводится по следующему изданию: Акафистник. Ч. I. – М.: Издание Московской Патриархии, 1992. – С. 241–249. – По благословению Святейшего Патриарха Московского и всея Руси Алексия II.



Икона великомученика и целителя Пантелеимона

Акафист великомученику и целителю Пантелеимону

Кондак 1

Избранный страстотерпче Христов и врачу благодатный, туне подаяй недугующим исцеления, песньми восхваляем тя, заступника нашего. Ты же, яко имеяй дерзновение ко Господу, от всяких бед и болезней свободдай нас, любовью тебе зовущих:

Радуйся, великомучениче и целителю Пантелеимоне.

Икос 1

Ангела земнаго и небеснаго человека веми ты, славный Пантелеимоне: ангельскою бо непорочною и мученичеством украшен, преселился еси от земли на Небо, идеже со Ангелы и всеми святыми предстои Престолу Господа славы, молися о нас, земных, почитающих ты званием сими:

Радуйся, светлосте благочестия;

радуйся, преславный светильниче Церкви.

Радуйся, мучеников пречестных украшение;

радуйся, верных в непоколебимом терпении утверждение.

Радуйся, юности преизрядная похвало;

радуйся, поборниче Христов, в мужестве неодоленный.

Радуйся, произрастший в мире, премирен явивыйся;

радуйся, ангеле во плоти, превосходяй смертных.

Радуйся, небожителю всеблаженный;

радуйся, Божественного разума вместилище.

Радуйся, имже вера возвысися;

радуйся, имже прелесть низложися.

Радуйся, великомучениче и целителю Пантелеимоне.

Кондак 2

Видя тя Владыка сосуд избран, возлюби души твоя доброту. Ты бо земную всякую сладость и славу презрев, венцем мученическим возжелел еси украситься, уязвлен Божественною любовью, и вдохновенно поя: Аллилуия.

Икос 2

Разум богодухновен имея, о доблий воителю Пантелеимоне, изумил еси царя Максимиана мужеством души твоея и словесы, имиже дерзновенно проповедал еси Христа. Темже похваляюще дерзновение твое, глаголем ти сице:

Радуйся, угрозы Максимиана презревый;
радуйся, советом нечестивых не покоривыйся.
Радуйся, насаждение истинного богопочитания;
радуйся, искоренение демонскаго служения.
Радуйся, неистовства мучителей изобличителю;
радуйся, идольския прелести низложителю.
Радуйся, разгnavый нечестивых соборища;
радуйся, пременивый тленная на небесная.
Радуйся, собеседниче невещественных Ангелов;
радуйся, сликовствователю многострадальных святых.
Радуйся, имже сатана посрамися;
радуйся, имже Христос прославися.
Радуйся, великомучениче и целителю Пантелеимоне.

Кондак 3

Силою Вышняго, дарованною тебе, и крепким терпением твоим обезсилил еси мучителеву дерзость, мужественный победоносче: огня, зверей, колеса не убоявся и мечем усечен во главу, венец победы приял еси от Христа Бога, взывая Ему: Аллилуия.

Икос 3

Имуще обитель твоя вседрагую главу твою, богомудрый
страстотерпче, яко превеликое сокровище, радости испол-
няется о сем, и любовью воспеваючи данную тебе от Бога
благодать исцелений, благодарно зовет ти:

Радуйся, Никомидии светильниче всесветлый;
радуйся, чтущей тя обители страже неусыпный.

Радуйся, имже охладе безбожие;
радуйся, имже возрасте богопознание.

Радуйся, светлая страстотерпцев славо;
радуйся, радостное православных слышание.

Радуйся, исцелений благодатный источниче;
радуйся, дарований великих вместилище.

Радуйся, благовонное миро, благоухающее души;
радуйся, яко помогаеши призывающим тя.

Радуйся, слепым зрение даровавый;
радуйся, хромым благосшествие устроиый.

Радуйся, великомучениче и целителю Пантелеимоне.

Кондак 4

Бурею помышлений многобожия одержим, нечестивый царь смутился, уведев от завиствовавших тебе врачей, яко всякия неисцельныя недуги целиши ты именем Христа. Мы же, с веселием славяще дивнаго в тебе Бога, вопием Ему: Аллилуия.

Икос 4

Слышавше никомидийстии людие о великом сострадании твоем к страждущим и о безмездном врачевании от всяких болезней, устремишася вси к тебе, с верою во врачующую благодать, в тебе сущую, и приемлюще скорая исцеления от всяких болезней, прославляху Бога и тебе величаху, всемилостиваго целителя своего, зовуще ти:

Радуйся, помазанный миром благодати;
радуйся, храме Бога освященный.

Радуйся, великая благочестивых славо;
радуйся, твердая озлобляемых стено.

Радуйся, мудрых превосходяй разумом;
радуйся, верных осиявай мысли.

Радуйся, Божественных даров приятелище и многообразных нам милостей Господних источниче;

радуйся, скорый помощниче страждущим.

Радуйся, обуреваемых пристанище;
радуйся, заблуждших наставниче.

Радуйся, болящих туне врачуй;
радуйся, обильно исцеления источаяй.

Радуйся, великомучениче и целителю Пантелеимоне.

Кондак 5

Чудо преславное сотвори с тобою Господь, егда чрез служителя Своего Ермолая призва тя в чудный Свой свет. Ехидною бо велиею угрызенно умершее отроча по молитве твоей ко Христу абие оживе и воста здраво. Познав убо Жизнодавца всех Истинного Бога, с твердою верою воззвал еси Ему: Аллилуия.

Икос 5

Узре свет слепый, емуже с призыванием имене Христова прикоснулся еси ты, славне. Ермолаем бо пресвитером просвещен, отринув отеческое многобожие, восприял еси матернее благочестие, имже и отца просветил еси. Сего ради тебе, славному угоднику Божию и чудному врачу, взываем:

Радуйся, к Богу велие рачение имеяй;

радуйся, присногорящий огню Божественныя любви.

Радуйся, деятельный послушателю священных поучений Ермолая;

радуйся, последовавый советам матери твоея Еввулы.

Радуйся, яко вся раздал еси, да Христа приобрящеши;

радуйся, любовь к миру любовью Божиею победивый.

Радуйся, яко вместо сладких мира за Христа лютая страдания приял еси;

радуйся, яко общник сотворился еси Страстем Христовым.

Радуйся, восторжествовавый над всеми страстьми;

радуйся, украсивыйся благодатным безстрастием.

Радуйся, исполняяй радости притекающия к тебе;

радуйся, туне исцеляяй всех благодатию Христовою.

Радуйся, великомучениче и целителю Пантелеимоне.

Кондак 6

Проповедник истины явился просвещенный тобою телесне и душевне слепец; подобно бо евангельскому слепцу, дерзновенно пред всеми исповеда Света Истиннаго Христа, просвещающа всякаго человека, нечестиваго же царя и боги язычския укорив, чрез мечное усечение взыде к немерцающему свету на Небеси пети Богу: Аллилуия.

Икос 6

С светлым лицом представ судилищу цареву, дерзновенно
взывал еси, преблаженне, во услышание всех: всецелебная
сила моя и слава Христос есть Истинный Бог, Владыка всех,
мертвые воскрешаяй и всяк недуг отгоняяй. За таковое ис-
поведание ублажающе тя, глаголем:

Радуйся, уста громогласная Божества Христова;
радуйся языче медоточный, вещаяй Его домостроитель-
ство.

Радуйся, вение превысшаго Богословия;
радуйся, сеятелю мудрый благочестия.
Радуйся, сладкозвучная веры свирель;
радуйся, славный проповедниче Православия.

Радуйся, прежде смерти явивый дивная;
радуйся, по смерти совершаяй чудная.

Радуйся, зрителю славы Христовы;
радуйся, послушателю молящихся тебе.

Радуйся, подателю милости тоя требующим;
радуйся, ходатаю благ почитающим память твою.

Радуйся, великомучениче и целителю Пантелеимоне.

Кондак 7

Миро излился на душу твою, богомудрый целебниче, от Утешителя Духа; темже по смерти честныя останки твоя, благоуханием своим страстей злосмрадие отгоняя, исцеление подают вопиющим верою Богу: Аллилуия.

Икос 7

Егда узреша идольстии читатели многолетна расслабленна, молитвою твоею, святе, воздвигнута и ходяща, мнози увероваша во Христа; жрецы же бесовстии, завистию снедаеми, подвигоша царя на ярость. Тебе убо нещадно за Христа стружему и опаляему бывшу, со умилением зовем:

Радуйся, наслаждения земная презревший;

радуйся, благ вещественных превысший.

Радуйся, яко вся красная мира сего ни во чтоже вменил еси;

радуйся, яко славу скоротекущую с себе отрясл еси.

Радуйся, неуловим пребывый ловлении Велиара;

радуйся, победивый мучителей коварства.

Радуйся, не пощадивый за Христа жизни своея;

радуйся, враг явивыйся враждебныя плоти.

Радуйся, многобожия широту утеснивший;

радуйся, Божественною силою идола поправый.

Радуйся, острейшая стрело, язвящая враги;

радуйся, предстателю, заступаяй верующия.

Радуйся, великомучениче и целителю Пантелеимоне.

Кондак 8

Страннолепно являшися тебе Господь, ободряя и соблю-
дая в мучениях за имя Его: во образе бо пресвитера Ермо-
лая, клопочущее олово, в неже ввержен был еси, охлади, и
в мори отрешив велий камень от выи твоея, изведе невре-
жденна на землю. Ты же, паки представ пред царя, торже-
ственно пел еси Христу Богу: Аллилуия.

Икос 8

Весь умне на Небеси водворяся, и низу на земли сущих не оставляеши, сопребывая с нами всечестною главою твоею, великий страстотерпче Христов, приемля от Господа и подавая просвещение и освящение вопиющим тебе таковая:

Радуйся, премудросте Божественная исполненный;
радуйся, промысления Божия о нас таинниче.

Радуйся, богомудренных умов услаждение;
радуйся, боголюбивых душ увеселение.

Радуйся, пресветлый Христов бисере;
радуйся, освященный душею и телом.

Радуйся, во дворех перворожденных на Небеси вселивыйся;

радуйся, в присноблаженных обитаяй чертозах.

Радуйся, света Троического зрителю;

радуйся, в молитвах к Богу теплый о нас предстателю.

Радуйся, просвещение душам подаваяй;

радуйся, скорбящим утешение ниспосылаяй.

Радуйся, великомучениче и целителю Пантелеимоне.

Кондак 9

Всякое естество удивися, Пантелеимоне, сиянию в тебе благодати и богатству добродетелей: ангелоподобней чистоте твоей, великому мужеству в лютых страданиях, крепкой любви ко Христу и многому состраданию к людем, в нихже твориши преславная, во еже пети: Аллилуия.

Икос 9

Ветия многовещанная не возмогут по достоянию восхвалити борения твоя, славный добропобедниче, како непобедимую силою Божиею, юный леты сый, победил еси древняго и исконнаго врага и посрамил еси идольскую прелесть. Мы же, удивления исполнении, зовем ти:

Радуйся, радостное зрелище Ангелов;

радуйся, благоговейное удивление человеков.

Радуйся, кровь за Христа излиывый и в смерти млеко источивый;

радуйся, тело за Него мученической смерти предавый.

Радуйся, исповедничества правило;

радуйся, доблий воине Царя царей.

Радуйся, тьмы державца победивый;

Радуйся, победою твоею небесных и земных обвеселивый.

Радуйся, горняго мира обитателю блаженный;

радуйся, дольняго мира мудрый странниче.

Радуйся, древо, украшенное плодами благодатных дарований;

радуйся, носяй добропобедныя ветви.

Радуйся, великомучениче и целителю Пантелеимоне.

Кондак 10

Сострадания исполнен, яко истинный подражатель Подателя милости Господа, честный страдальче, Пантелеимоном (си есть, всемилостивым) от Него проименован еси, на вся притекающия к тебе милость изливая, юже и нам неоскудно источай, о тебе вопиющим Богу: Аллилуия.

Икос 10

Стену ты твердо обрет мучитель, никиими же муками победиму, покусися сокрушити крепость твою зубы зверей и остриями мучилищнаго колеса, обаче и в сем ничтоже успе: сила бо Христова лютость зверей укроти, а страшное коло, на немже обращаемо бе тело твое, абие сокрушися.

Тебе убо непобедимому страсготерпцу зовем:

Радуйся, честное Христово избрание;

радуйся, непорочное Богови благоухание.

Радуйся, твердый адаманте Церкви;

радуйся, непоколебимый столпе, досязаяй до Небесе.

Радуйся, звери видимыя укрощаяй;

радуйся, драконов невидимых сокрушаяй.

Радуйся, обогранный твоею за Христа кровию, сраство-
ренною млеком;

радуйся, неувядаемая приемый венцы.

Радуйся, радость даровавый Ангелом и человеком;

радуйся, прославленный Богом на Небеси и на земли.

Радуйся, небожителю, ликовствуяй с мученики;

радуйся, насыщаяйся лицезрением Христа пресладким.

Радуйся, великомучениче и целителю Пантелеимоне.

Кондак 11

Песнь исходную приносим твоему за Христа заколению священному, в немже вместе с кровию млеко истече от тебе, великомучениче, и масличина, под неюже усечен был еси, исполнися целительных плодов. Темже Христу, дивно прославляющему славящия Его, тепле вопием: Аллилуия.

Икос 11

Светозарная луча был еси, богомудре, во тьме многобожия сидящим, путеводящая к Солнцу Правды Христу Богу, Емуже молися во свете заповедей Его присно пребывати и нам, сицевая радостная тебе приносящим:

Радуйся, пресветлая звездо, на мысленной тверди блистающая;

радуйся, луча, христоименитым людям светящая.

Радуйся, таинственно облиставаемый от Солнца Христа;

радуйся, умне землю обтекаая.

Радуйся, селение красное Пресвятаго Духа;

радуйся, сосуде пречестный, изливаяй исцеления.

Радуйся, чистоты сокровище;

радуйся, милости тезоимените.

Радуйся, Царствия Небеснаго наследниче;

радуйся, вечныя славы сопричастниче.

Радуйся, предстателю бедствующим в мори житейстем;

радуйся, безсребрениче, помогаяй призывающим тя с верою.

Радуйся, великомучениче и целителю Пантелеимоне.

Кондак 12

Благодати обилие приял еси, треблаженне, по обилию любви твоея ко Христу Богу, Иже и яви тя многоцелебным источником, безмездно врачующим душевныя и телесныя болезни притекающих к тебе с верою и Богу вопиющих: Аллилуия.

Икос 12

Поюще многострадальныя подвиги твоя за Христа, славный страстотерпче, хвалим долготерпение твое, ублажаем мученическую кончину, почитаем и священную память твою, заступниче наш и целителю, и в похвалу сицевая тебе зовем:

Радуйся, благочестия трубо благозвучная;
радуйся, мечу, посещаяй нечестие.

Радуйся, строганный на древе за Распростершаго руце
Свои на древе Крестнем;

радуйся, яко опаляемъ за Него, прелести пещь угасил еси.
Радуйся, язвами твоими враги уязвивый;

радуйся, кровию твоею токи идольския крове изсушивый.
Радуйся, в кипящее олово вверженный за Христа;

радуйся, погруженный за имя Его в водах морских.

Радуйся, промыслиением Божиим неврежден в сих пребывый;

радуйся, яко чрез огонь и воду мучения вшел еси в покой
небесный.

Радуйся, изливаяй неизсякаемая струи милости верным;

радуйся, благосострадательный врачу, исцеления благодать подаваяй.

Радуйся, великомучениче и целителю Пантелеимоне.

Кондак 13

О многострадальный и предивный страстотерпче Христов и целителю наш Пантелеимоне! Милостиво прием сие малое от нас приношение, от многообразных недугов исцели ны и предстательством твоим сохрани от враг видимых и невидимых, и вечного мучения избавитися нам Господа умоли, да во Царствии Его выну воспеваем: Аллилуия.

Этот кондак читается трижды, и снова 1й икос и 1й кондак:

Икос 1

Ангела земнаго и небеснаго человека ве мы тя, славный Пантелеимоне: ангельскою бо непорочностию и мученичеством украшен, преселился еси от земли на Небо, идеже со Ангелы и всеми святыми предстоя Престолу Господа славы, молися о нас, земных, почитающих тя звании сими:

Радуйся, светлосте благочестия;

радуйся, преславный светильниче Церкви.

Радуйся, мучеников пречестных украшение;

радуйся, верных в непоколебимом терпении утверждение.

Радуйся, юности преизрядная похвало;

радуйся, поборниче Христов, в мужестве неодоленный.

Радуйся, произрастший в мире, премирен явивыйся;

радуйся, ангеле во плоти, превосходяй смертных.

Радуйся, небожителю всеблаженный;

радуйся, Божественного разума вместилище.

Радуйся, имже вера возвысися;

радуйся, имже прелесть низложися.

Радуйся, великомучениче и целителю Пантелеимоне.

Кондак 1

Избранный страстотерпче Христов и врачу благодатный, туне подавай недугующим исцеления, песньми восхваляем тя, заступника нашего. Ты же, яко имеяй дерзновение ко Господу, от всяких бед и болезней свободдай нас, любовью тебе зовущих: **Радуйся**, великомучениче и целителю Пантелеимоне.

Молитва

О великий Христов угодниче и преславный целебниче, великомучениче Пантелеимоне! Душею на Небеси Престолу Божию предстояй и триипостасныя Его славы наслаждаясь, телом же и ликом святым на земли в Божественных храмах почиваяй и данною ти свыше благодатию различная чудеса источаяй, призри милостивным твоим оком на предстоящая люди, честней твоей иконе умильно молящиеся и просящие от тебе целебныя помощи и заступления: простири ко Господу Богу нашему теплыя твоя молитвы и испроси душам нашим оставление согрешений. Се бо мы, за беззакония наша не смеюще возвести очеса наша к высоте небесней, ниже вознести глас молебный к Его в Божестве неприступней славе, сердцем сокрушенным и духом смиренным тебе, ходатая милостива ко Владыце и молитвенника за ны, грешныя, призываем, яко ты приял еси благодать от Него недуги отгоняти и страсти исцеляти. Тебе убо просим: не презри нас, недостойных, молящихся тебе и твоя помощи требующих. Буди нам в печалех утешитель, в недужех лютых страждующим врач, нападствуемым скорый покровитель, очесем недугующим прозрения датель, ссушим и младенцем в скорбех готовейший предстатель и исцелитель: исходатайствуй всем вся, яже ко спасению полезная, яко да твоими ко Господу Богу молитвами получивше благодать и милость, прославим

всех благих Источника и Дароподателя Бога, Единого в Троице Святей славимаго Отца и Сына и Святаго Духа ныне и присно и во веки веков. Аминь.

Текст акафиста приводится по следующему изданию: Акафистник. Ч. I. – М.: Издание Московской Патриархии, 1992. – С. 203–210. – По благословению Святейшего Патриарха Московского и всея Руси Алексия II.



Икона Святителя Николая Чудотворца

Акафист святителю Николаю Чудотворцу

Кондак 1

Возбранный Чудотворче и изрядный угодниче Христов, миру всему источаяй многоценное милости миро и неисчерпаемое чудес море, восхваляю тя любовью, святителю Николае; ты же, яко имеяй дерзновение ко Господу, от всяких мя бед свободи, да зову ти:

Радуйся, Николае, великий Чудотворче.

Икос 1

Ангела образом, земнаго суща естеством яви тебе вся твари Создатель; благоплодную бо доброту души твоя провидев, преблаженне Николае, научи всех вопити тебе сице:

Радуйся, от утробы матерния очищенный;

радуйся, даже до конца освященный.

Радуйся, рождением своим родителей удививый;

радуйся, силу душевную абие по рождестве явивый.

Радуйся, саде земли обетования;

радуйся, цвете Божественнаго сажения.

Радуйся, лозо добродетельная винограда Христова;

радуйся, древо чудоточное рая Иисусова.

Радуйся, крине райскаго прозябения;

радуйся, миро Христова благоухания.

Радуйся, яко тобою отгонится рыдание;

радуйся, яко тобою приносится радование.

Радуйся, Николае, великий Чудотворче.

Кондак 2

Видяще твоих мир излияние, богомудре, просвещаемся душами и телесы, дивнаго тя мироточца живоносна, Николае, разумеюще: чудесы бо яко водами, благодатию Божиею изливающимися, напаяеши верно вопиющих к Богу: Аллилуия.

Икос 2

Разум неуразуменный вразумляя о Святей Троице, был еси в Никеи со святыми отцы поборник исповедания православныя веры: равна бо Отцу Сына исповедал еси, соприсносущна и сопрестольна, Ария же безумнаго обличил еси. Сего ради вернии научишася воспевати тебе:

Радуйся, великий благочестия столпе;
радуйся, верных прибежища граде.
Радуйся, твердое Православия укрепление;
радуйся, честное Пресвятыя Троицы носило и похваление.

Радуйся, Отцу равночестна Сына проповедавый;
радуйся, Ария возбесившагося от собора святых отгнавый.

Радуйся, отче, отцев славная красото;
радуйся, всех богомудрых премудрая доброто.
Радуйся, огненная словеса испущай;
радуйся, добре стадо свое наставляй.
Радуйся, яко тобою вера утверждается;
радуйся, яко тобою ересь низлагается.
Радуйся, Николае, великий Чудотворче.

Кондак 3

Силою, данною ти свыше, слезу всяку отъял еси от лица люте страждущих, богоносе отче Николае: алчущим бо явился еси кормитель, в пучине морстей сущим изрядный правитель, недугующим исцеление и всем всяк помощник показался еси, вопиющим Богу: Аллилуия.

Икос 3

Имешае воистину, отче Николае, с Небесе песнь тебе воспеваема быти, а не от земли: како бо кто от человек возможет твоя святыни величия проповедати? Но мы, любовию твоею побеждаеми, вопием ти сице:

Радуйся, образе агнцев и пастырей;

радуйся, святое очистилище нравов.

Радуйся, добродетелей великих вместилище;

радуйся, святыни чистое и честное жилище.

Радуйся, светильниче всесветлый и вселюбимый;

радуйся, свете златозарный и непорочный.

Радуйся, достойный Ангелов собеседниче;

радуйся, добрый человеков наставниче.

Радуйся, правило веры благочестивыя;

радуйся, образе кротости духовныя.

Радуйся, яко тобою от страстей телесных избавляемся;

радуйся, яко тобою сладостей духовных исполняемся.

Радуйся, Николае, великий Чудотворче.

Кондак 4

Буря недоумения смущает ми ум, како достойно есть пети чудеса твоя, блаженне Николае; никтоже бо может я исчести, аще бы и многи языки имел и глаголати восхотел; но мы дивно Богу, в тебе прославляющемуся, дерзаем воспевати: Аллилуия.

Икос 4

Слышаша, богомудре Николае, ближнии и дальнии величие чудес твоих, яко по воздуху легкими благодатными крилами навykl еси сущих в бедах предвариати, скоро от тех избавляя всех, вопиющих к тебе таковая:

Радуйся, избавление от печали;

радуйся, подавание благодати.

Радуйся, нечаемых зол прогонителю;

радуйся, желаемых благих насадителю.

Радуйся, скорый утешителю в беде сущих;

радуйся, страшный наказателю обидящих.

Радуйся, чудес пучино, Богом излианная;

радуйся, закона Христова скрижали, Богом писанная.

Радуйся, крепкое падающих возведение;

радуйся, право стоящих утверждение.

Радуйся, яко тобою всякая лесь обнажается;

радуйся, яко тобою всякая истина сбывается.

Радуйся, Николае, великий Чудотворче.

Кондак 5

Боготечная звезда явился еси, наставляя по морю плавающих люте, имже смерть предстояше вскоре иногда, аще не бы ты предстал еси призывающим тя в помощь, Чудотворче святой Николае; уже бо нестыдно бесом летающим и погрузити корабли хотящим запретив, отгнал еси их, верныя же научил еси спасающему тобою Богу взывати: Аллилуия.

Икос 5

Видеша отроковицы, на брак скверный нищеты ради уго-
тованныя, великое твое к нищим милосердие, преблаженне
отче Николае, егда старцу родителю их нощию узельцы три
злата таяся подал еси, самага со дщерьми избавляя от паде-
ния греховнаго. Того ради слышиши от всех сице:

Радуйся, милости превеликия сокровище;

радуйся, промышления о людех приятиище.

Радуйся, пище и отрадо к тебе прибегающих;

радуйся, хлебе неснедаемый алчущих.

Радуйся, богатство, бедне живущим на земли Богом дан-
ное;

радуйся, воздвижение скорое убогих.

Радуйся, быстрое нищих услышание;

радуйся, скорбящих приятное попечение.

Радуйся, триех дев непорочный невестителю;

радуйся, чистоты усердный хранителю.

Радуйся, ненадежных надеяние;

радуйся, всего мира наслаждение.

Радуйся, Николае, великий Чудотворче.

Кондак 6

Проповедует мир весь тебе, преблаженне Николае, скорого в бедах заступника, яко многажды во едином часе по земли путешествующим и по морю плавающим, предваряя, поспособствуеши, купно всех от злых сохраняя, вопиющих к Богу: Аллилуия.

Икос 6

Возсиял еси свет животный, избавление нося воеводам, неправедную смерть прияти имущим, тебе, добрый пастырю Николае, призывающим, егда вскоре явлься во сне цареви, устрасил еси его, сих же неврежденных отпустить повелел еси. Сего ради с ними купно и мы благодарственно вопием ти:

**Радуйся, усердно призывающим тя помогаяй;
радуйся, от неправеднаго убиения избавляяй.**

**Радуйся, от лестных сохраняяй клеветы;
радуйся, неправедныя разрушаяй советы.**

**Радуйся, растерзаяй лжу яко паучину;
радуйся, возношаяй славно истину.**

**Радуйся, неповинных от уз разрешение; радуйся, и мерт-
вцев оживление.**

**Радуйся, проявителю правды;
радуйся, помрачителю неправды.**

**Радуйся, яко тобою неповиннии избавлены от меча;
радуйся, яко тобою насладишася света.**

Радуйся, Николае, великий Чудотворче.

Кондак 7

Хотя богохульное еретическое отгнати злосмрадие, миро
воистину благовонное, таинственное явился еси, Николае,
люди мирейския упасл еси и весь мир своим благодатным
миром исполнил еси. И от нас убо богомерзкое греховное
злосмрадие отжени, да благоприятно Богу вопием: Аллилу-
ия.

Икос 7

Новаго тя Ноя, наставника ковчега спасительнаго разуме-
ем, отче святой Николае, бурю всех лютых разгоняющего на-
правлением своим, тишину же Божественную приносящего
вопиющим таковая:

Радуйся, буруемых тихое пристанище;
радуйся, утопающих известное хранилище.

Радуйся, плавающих посреде пучин добрый кормчий;
радуйся, треволнения морская уставляющий.

Радуйся, превожделение сущих в вихрах;
радуйся, согреяние сущих во мразех.

Радуйся, сияние, скорбный мрак разгоняющее;
радуйся, светило, вся концы земли просвещающее.

Радуйся, от бездны греховныя человеки избавляяй;
радуйся, в бездну адскую сатану ввергаяй.

Радуйся, яко тобою дерзновенно бездну милосердия Бо-
жия призываем;

радуйся, яко тобою от потопа гнева избавльшеся, мир с
Богом обретаем.

Радуйся, Николае, великий Чудотворче.

Кондак 8

Странное чудо является притекающим к тебе, блаженне Николае, священная твоя церковь: в ней бо и малое моление приносяще, велиих недугов приемлем исцеление, аще токмо по Бозе упование на тя возложим, верно вопиюще: Аллилу-
ия.

Икос 8

Весь еси всем воистину помощник, богоносе Николае, и собрал еси вкупе вся прибегающия к тебе, яко свободитель, питатель и врач скорый всем земным, на похвалу всех подвизая вопити к тебе сице:

Радуйся, всяких исцелений источниче;

радуйся, люте страждущим помощниче.

Радуйся, заре, сияющая в ночи греховной блуждающим;

радуйся, росе неботочная в знои трудов сущим.

Радуйся, подаваяй требующим благостроение;

радуйся, уговоряяй просящим изобилие.

Радуйся, многажды прошение предваряяй;

радуйся, старым сединам силу обновляяй.

Радуйся, многих заблуждших от пути истиннаго обличителю;

радуйся, таин Божиих верный служителю.

Радуйся, яко тобою зависть попираем;

радуйся, яко тобою благонравное житие исправляем.

Радуйся, Николае, великий Чудотворче.

Кондак 9

Всякия утоли болезни, великий наш заступниче Николае, растворяя благодатная врачевания, услаждающая души наша, сердца же веселящая всех усердно к помощи твоей приходящих, Богу же вопиющих: Аллилуия.

Икос 9

Ветия суемудренныя нечестивых видим тобою посрам-
ленныя, богомудре отче Николае: Ария бо хульника, разде-
ляюща Божество, и Савеллия, смешающа Святую Троицу,
препрел, нас же во Православии укрепил еси. Сего ради во-
пием ти сице:

Радуйся, щите, защищай благочестие;

радуйся, мечу, посещая злочестие.

Радуйся, учителю Божественных велений;

радуйся, губителю богопротивных учений.

Радуйся, лестнице, Богом утвержденная, еюже восходим
к небеси;

радуйся, покрове, Богом зданный, имже покрываются
мнози.

Радуйся, немудрых умудривый твоими словесы;

радуйся, ленивых подвигнувый твоими нравами.

Радуйся, светлосте заповедей Божиих неугасимая;

радуйся, луче оправданий Господних пресветлая.

Радуйся, яко учением твоим сокрушаются еретическия
главы;

радуйся, яко тобою вернии сподобляются славы.

Радуйся, Николае, великий Чудотворче.

Кондак 10

Спасти хотя душу, плоть твою духови покорил еси воистину, отче наш Николае: молчаньми бо прежде и бореньми с помыслы, деянию богомыслие приложил еси, богомыслием же разум совершен стяжал еси, имже дерзновенно с Богом и Ангелы беседовал еси, всегда вопия: Аллилуия.

Икос 10

Стена еси похваляющим, преблаженне, чудеса твоя и всем к заступлению твоему прибегающим; темже и нас, в добродетели убогих, от нищеты, напасти, недугов и нужд различных свободдай, вопиющих ти с любовью таковая:

Радуйся, от убожества вечного изымаяй;

радуйся, богатство нетленное подаваяй.

Радуйся, брашно негиблющее алчущим правды;

радуйся, питье неисчерпаемое жаждущим жизни.

Радуйся, от мятежа и брани соблюдаяй;

радуйся, от уз и пленения свободдаяй.

Радуйся, преславный в бедах заступниче;

радуйся, превеликий в напастех защитниче.

Радуйся, многих от гибели исхитивый;

радуйся, безчисленных неврежденно сохранивый.

Радуйся, яко тобою лютыя смерти грешнии избегают;

радуйся, яко тобою жизнь вечную кающиеся получают.

Радуйся, Николае, великий Чудотворче.

Кондак 11

Пение Пресвятей Троице паче иных принесл еси, преблаженне Николае, умом, словом и делом: многим бо испытанием правоверная повеления уяснил еси, верою, надеждою и любовью наставляя нас в Троице Единому Богу воспевати: Аллилуия.

Икос 11

Светозарную лучу во мраце жития сущим неугасимую видим тя, Богом избранне отче Николае: с невещественными бо ангельскими светы беседуеши о несозданном Троическом свете, верных же души просвещаеши, вопиющих ти таковая:

Радуйся, озарение Трисолнечного Света;

радуйся, деннице незаходимаго Солнца.

Радуйся, свеще, Божественным пламенем возжженная;

радуйся, яко угасил еси бесовский пламень нечестия.

Радуйся, светлое правоверия проповедание;

радуйся, доброзрачное света евангельского сияние.

Радуйся, молние, ереси пожигающая;

радуйся, громе, устрашающий соблазняющих.

Радуйся, истиннаго научителю разума;

радуйся, таинственнаго изъясвителю ума.

Радуйся, яко тобою попрося поклонение твари;

радуйся, яко тобою научихомся поклоняться Творцу в Троице.

Радуйся, Николае, великий Чудотворче.

Кондак 12

Благодать, данную ти от Бога, сведущии, радующеся твою память празднуем по долгу, преславный отче Николае, и к чудному заступлению твоему вседушно притекаем; преславных же твоих деяний, яко песка морского и множества звездного исчести не могуще, недоумением объяти бывше, вопием к Богу: Аллилуия.

Икос 12

Поюще твоя чудеса, восхваляем тя, всехвальне Николае:
в тебе бо Бог, в Троице прославляемый, дивно прославися.
Но аще и попремногу составленныя от души псалмы и песни приносим ти, Чудотворче святыи, ничтоже творим равно дарованию чудес твоих, имже удивляющесе, вопием к тебе таковая:

Радуйся, Царя царствующих и Господа господствующих служителю;

радуйся, служителей Его небесных сожителю.

Радуйся, людем верным поможение;

радуйся, рода христианскаго возвышение.

Радуйся, победы тезоименитый;

радуйся, венченосче нарочитый.

Радуйся, всех добродетелей зеркало;

радуйся, всех притекающих к тебе крепкое забрало.

Радуйся, по Бозе и Богородице все наше упование;

радуйся, телес наших здравие и душ спасение.

Радуйся, яко тобою от вечныя смерти свободяемся;

радуйся, яко тобою безконечныя жизни сподобляемся.

Радуйся, Николае, великий Чудотворче.

Кондак 13

О пресвятый и пречудный отче Николае, утешение всех скорбящих, нынешнее наше приими приношение и от геены избавитися нам Господа умоли богоприятным твоим ходатайством, да с тобою воспевает: Аллилуия.

Этот кондак читается трижды, и снова 1й икос и 1й кондак:

Икос 1

Ангела образом, земнаго суща естеством яви тебе вся твари Создатель; благоплодную бо доброту души твоя провидев, преблаженне Николае, научи всех вопити тебе сице:

Радуйся, от утробы матерния очищенный;

радуйся, даже до конца освященный.

Радуйся, рождением своим родителей удививый;

радуйся, силу душевную абие по рождестве явивый.

Радуйся, саде земли обетования;

радуйся, цвете Божественнаго сажения.

Радуйся, лозо добродетельная винограда Христова;

радуйся, древо чудоточное рая Иисусова.

Радуйся, крине райскаго прозябения;

радуйся, миро Христова благоухания.

Радуйся, яко тобою отгонится рыдание;

радуйся, яко тобою приносится радование.

Радуйся, Николае, великий Чудотворче.

Кондак 1

Возбранный Чудотворче и изрядный угодниче Христов, миру всему источаяй многоценное милости миро и неисчерпаемое чудес море, восхваляю тя любовью, святителю Николае; ты же, яко имеяй дерзновение ко Господу, от всяких мя бед свободи, да зову ти:

Радуйся, Николае, великий Чудотворче.

Молитва

О всесвятый Николае, угодниче преизрядный Господень, теплый наш заступниче, и везде в скорбех скорый помощниче! Помози ми, грешному и унылому, в настоящем сем житии, умоли Господа Бога даровати ми оставление всех моих грехов, елико согреших от юности моея, во всем житии моем, делом, словом, помышлением и всеми моими чувствы; и во исходе души моея помози ми, окаянному, умоли Господа Бога, всея твари Содетеля, избавити мя воздушных мытарств и вечного мучения, да всегда прославляю Отца и Сына и Святаго Духа и твое милостивное предстательство, ныне и присно и во веки веков. **Аминь.**

Текст акафиста приводится по следующему изданию: Православный молитвослов и Псалтирь. – М.: Издание Московской патриархии, 1988. – С. 64–71. – По благословению Святейшего Патриарха Московского и всея Руси Пимена.